

რეცენზია

დიმიტრი შველიძე

დაგვიანებული გამოხმაურება ნაადრევი დისერტაციის შესახებ

საკითხი ეხება ნატო სონდულაშვილის სადოქტორო დისერტაციას თემაზე: „ქართული ერთობა და ეროვნული იდენტობა XX საუკუნის პირველ ოცნებულში“. დისერტაციის დაცვა შედგა 2012 წლის 26 ივლისს ივანე ჯავახიშვილის სახელობის თბილისის სახელმწიფო უნივერსიტეტში.

ჩვეულებრივად ასე ხდება: თუ დისერტაციისადმი რამე კრიტიკული აზრი გაქვს, უნდა გამოთქვა ან როგორც ოპონენტმა, ან როგორც სადისერტაციო კომისიის წევრმა. მე ადრე გადავათვალიერე სადისერტაციო ნაშრომი და თავიდანვე გამიჩნდა უარყოფითი აზრი მის შესახებ. უარყოფითი აზრი არ ეხებოდა ნაშრომის რომელიმე ან რამდენიმე საკითხს. იგი ეხებოდა მთლიანად სადისერტაციო ნაშრომს, რის გამოც მიმაჩნდა, რომ თემა არ იყო მზად საჯარო დაცვისათვის. ამის შესახებ რამდენჯერმე გავაფრთხილე დისერტანტი, ვთხოვე, თავი შეეკავებინა ამ ეტაპზე დისერტაციის დაცვისაგან. სათანადო გადამუშავების შემდეგ იგი შეძლებდა დისერტაციის ღირსეულად დაცვას. სამწუხაროდ, ასე არ მოხდა.

მაშინ მე დავპირდი დისერტანტს, რომ ჩემს მოსაზრებას მისი დისერტაციის შესახებ ჩამოვაყალიბებდი სამეცნიერო პუბლიკაციის სახით. ასეც ვიქცევი ერთი მიზეზის გამო: იმისათვის, რომ ობიექტურად შემეფასებინა ნაშრომი, თავიდანვე დავრწმუნდი, რომ საჭირო იყო სადისერტაციო ნაშრომის დეტალური შესწავლა. ოპონენტობის შემთხვევაში გამოყოფილი დრო საამისოდ არ მეყოფოდა, რის გამოც შემოთავაზებულ ოპონენტობაზე უარი განვაცხადე. მეორე მიზეზიც აქვს ჩემს გადაწყვეტილებას, რომ პუბლიკაციის სახით გამოვხმაურებოდი აღნიშნულ სადისერტაციო ნაშრომს. ბოლო წლებში უკიდურესად გაადვილდა სადოქტორო დისერტაციების დაცვის პროცესი, მოთხოვნები და კრიტერიუმები. მიმაჩნია, რომ სამეცნიერო წრეები და შესა-

ბამისი სტრუქტურები უნდა დაფიქრდნენ ამის შესახებ, რათა დისერტაციები სათანადოდ მომზადეს. იმის ერთ-ერთ მაგალითად, რომ დღევანდელი წესებით, მოთხოვნებით და კრიტერიუმებით შესაძლებელია წყალწყალა დისერტაციების დაცვა, წინამდებარე ნაშრომი მიგვაჩნია. ამის გამო მინდა საზოგადოების ყურადღება მივაპყრო ამ ნაშრომზე, როგორც გარკვეული უარყოფითი მოვლენის, ტენდენციის ერთ-ერთ მაგალითზე.

შესაძლოა ვცდებოდე. თუ ასეა, მკითხველმა განსაჯოს.

დისერტაციის თემატიკა და მიზანი უაღრესად საინტერესოა. ეროვნული იდენტობის პრობლემით ადრეც ინტერესდებოდნენ ისტორიკოსები, მაგრამ საბჭოთა იდეოლოგიური წნევი არ იძლეოდა პრობლემის თავისუფალი გააზრების საშუალებას. უკანასკნელ წლებში ქართველი ისტორიკოსები დაინტერესდნენ ეროვნული იდენტობის შესახებ არსებული დასავლური თეორიული პროდუქციით. ითარგმნა რამდენიმე დასავლელი ცნობილი ავტორის ნაშრომებიც. ნატო სონდულაშვილის სადისერტაციო ნაშრომის თემატიკა ამ სასიკეთო ტენდენციის ერთ-ერთი გამოვლინებაა.

ავტორის მიზანია, დასავლური თეორიული ნააზრევის გამოყენებით გაიაზროს საქართველოს ახალი ისტორიის ერთ-ერთი საინტერესო პერიოდის ქართული საზოგადოების ეროვნული იდენტობის გზა. თავის მიზან-ამოცანებს დისერტაციი ასე აყალიბებს: „ჩემს მიზანს წარმოადგენს ქართული სინამდვილის შესწავლა XX საუკუნის პირველი ოცწლეულის საქართველოში, კერძოდ, რა გზა განვლო ქართველი ერის ცნობიერებამ 1900-1921 წლებში. ვფიქრობ, როი სრულიად განსხვავებული პერიოდის შედარებითი ანალიზი მრავალ პრობლემატურ საკითხს მოჰყენს ნათელს“. ავტორს მხედველობაში აქვს 1917 წლამდელი და მისი შემდგომი პერიოდები. (იხ., სადისერტაციო ნაშრ., გვ. 8. ამის შემდეგ ნაშრომის გვერდებს მიუჟოთებთ – დ. შ.).

ნაშრომის შესავალ ნაწილში ავტორი განაგრძობს საკვლევი მიზნების, ამოცანების, პრობლემების ჩამოყალიბებას. ისინი, რბილად რომ ვთქვათ, საკმაოდ ფართო და მასშტაბურია. კერძოდ, ავტორის მიზნებია:

ყურადღების გამახვილება იმაზე, თუ როგორ აღიქმებოდა ქართულ პოლიტიკურ აზროვნებაში ქართველი ერის წარმოშობის საკითხი (გვ. 4);

შესწავლა იმისა, თუ რა ცვლილება განიცადა ეროვნული ცნობიერების ფორმირებამ XX საუკუნის პირველ ოცწლეულში და რა ფასეულობებზე დაყრდნობით მოიაზრებდა თავს „ქართველი“ ერთობის წევრად (გვ. 4);

„...ჩემი მიზანი საზოგადოებრივი აღქმების კვლევაა...“ (გვ. 4) – აკონკ-

რეტებს ავტორი და განმარტავს, რომ „პირველ რიგში“ აუცილებელია განისაზღვროს ეპოქის, ანუ 1900-1921 წლების ძირითადი მოვლენები და მათი გაგლენა საზოგადოებაზე და მეორე, საჭიროა სოციალური ფენების კლასიფიკაცია, თითოეული მათგანის ღირებულებათა გამოკვეთა და მთლიანობაში გააზრება“ (გვ. 5); „როგორ მოიაზრებდა მთლიანობაში ქართველი დროის მსვლელობაში თავს ერთობის წევრად და რა ფასეულობათა სისტემა განსაზღვრავდა მათ ბრძოლას თვითგადარჩნისა და თვითდამკვიდრებისათვის“ (გვ. 5);

მივყვეთ ავტორის მიზან-ამოცანებს: „...ქართველი ერის იდენტობრივი ანალიზი, ანუ საზოგადოებრივი აღქმების წარმოჩენა საშუალებას მოგვცემს, ახლებურად შევხედოთ და განსხვავებული კუთხით დავამუშავოთ სხვადასხვა ისტორიული მოვლენა“ (გვ. 8);

„დისერტაციაში მთლიანობაშია წარმოდგენილი და გაანალიზებული ხშირ შემთხვევაში ცალკეულ საკითხებად შესწავლილი პრობლემები. ნაჩვენებია, რა გზა განვლო საქართველომ XX საუკუნის პირველი ოცწლეულის მანძილზე; რა ცვლილებები განიცადა სხვადასხვა სოციალური ფენის ცნობიერებამ, რა ფორმით იყო წარმოდგენილი ეროვნული თავისუფლების ფენომენი და როგორ ვითარდებოდა მთლიანობაში ქართველი ერი“ (გვ. 8);

„...1900-1921 წლების შესახებ კომპლექსური გამოკვლევა არ არსებობს. დისერტაცია აღნიშნულის მცდელობას წარმოადგენს. ...როგორც უკვე აღვნიშნე, ჩემს მიზანს წარმოადგენს აღვადგინო და შევაფასო ქართული გარემო 1900-1921 წლებში“ (გვ. 14).

ცცადოთ და შევაჯამოთ, ოღონდ მხოლოდ ავტორისეული სიტყვებით: ქართველი ერის წარმოშობის საკითხი; ქართველი საზოგადოების ეროვნული იდენტობის გზა; 1900-1921 წლების ქართული სინამდვილის შესწავლა; ეროვნული ცნობიერების გზა; ეროვნული ცნობიერების ცვლილებები და ფორმირება; საზოგადოებრივი აღქმების შესწავლა; სოციალური ფენების კლასიფიკაცია და მათი ღირებულებები; სოციალური ფენების ცნობიერება; ეროვნული თავისუფლების ფენომენი და მისი აღქმა; 1900-1921 წლების ქართული გარემოს აღდგენა და კომპლექსური გამოკვლევა... ავტორის მიერ წარმოსახული მიზნების პანორამა ამით არ მთავრდება. ისინი მეორდება და ფართოვდება შემდგომ თავებში. მის შესახებ ქვემოთ.

ავტორის მიზნები, როგორც ვხედავთ, სერიოზულია. მას ძირითადად ჩამოყალიბებული აქვს პრიორიტეტული საკვლევი პრობლემები. ამ მხრივ რაიმე სერიოზული პრეტენზია არ გაგვაჩნია, გარდა ერთი გარემოებისა. ავ-

ტორი საჭირო, აუცილებლად შესასწავლ პრობლემებთან ერთად მიზნად ისახავს, აგრეთვე, ისეთი საკითხების შესწავლასასაც, რომელიც არაა აუცილებელი მისი კვლევისათვის. ამავდროულად, ისინი ისე აფართოებენ საკვლევ პრობლემათა მასშტაბს, რომ მათი სრულფასოვანი შესწავლა საეჭვო ხდება.

ეროვნული იდენტობის შესწავლა ავტორის კვლევის უშუალო ობიექტია, მაგრამ ავტორი აშკარად სცილდება საკვლევ პრობლემათა საზღვრებს, როცა მიზნად ისახავს 1900-1921 წლების „ქართული სინამდვილის“, „ქართული გარემოს“ აღდგენას ან კიდევ – 1900-1921 წლების პერიოდის „კომპლექსურ გამოკვლევას“. მაშასადამე, რომ ავტორმა იმ დიდი და უნიკალური პერიოდის საქართველოს ყოფა-ცხოვრების ყველა მხარე უნდა შეისწავლოს, რომელიც ისეთი მოცულობით შეზღუდული ნაშრომის ფარგლებში, როგორიც სადოქტორო დისერტაციაა, პრაქტიკულად შეუძლებელია.

გარდა ამისა, ავტორმა ვერ გაითვალისწინა აგრეთვე საკვლევი პრობლემის მეტისმეტი ქრონოლოგიური სიფართოვე. 1900-1917 და 1917-1921 წლების პერიოდების საქართველოს ისტორია ორი სრულიად განსხვავებული და ცალკე შესასწავლი პრობლემებია და მათი სრულყოფილად შესწავლა ერთი სადოქტორო დისერტაციის ფარგლებში არარეალისტური ამოცანაა. ასეთ შემთხვევაში ნაშრომი წინასწარაა განწირული, რომ იყოს მეტისმეტად ზედაპირული, ზოგადი და ფრაგმენტული.

მაგრამ არ გვინდა, აგრეთვე. იქნებ ვცდებით და ავტორმა ეს ყველაფერი გაითვალისწინა? იქნებ მან გვიპასუხოს, რომ მისი ნაშრომი თეორიულ-ანალიტიკური ხასიათისა და ასეთ შემთხვევაში უფრო ფართო ქრონოლოგიური პერიოდის კვლევაც შეიძლებოდა. სანამ ავტორს თავად არ წამოუყენებია ამგვარი არგუმენტი, თავს შევიკავებოთ მისი უსაფუძვლობის დასაბუთებისაგან.

ახლა რაც შეეხება პირველ თავს, რომლის სახელწოდებაცაა: „ეროვნული პრობლემის ზოგიერთი საკითხი“. რატომ დასჭირდა ამ „ზოგიერთი საკითხის“ განხილვა ავტორს, აღნიშნულ თავში არ განმარტავს, მაგრამ ამის შესახებ საუბარია ნაშრომის შესავალსა და დასკვნაში. შესავალში ავტორი განგვიმარტავს, რომ პირველ თავში „წარმოდგენილა, თუ როგორ მოიაზრებოდა ქართველი ერის ჩამოყალიბება XX საუკუნის პირველი ოცწლეულის ქართული კულტურული და პოლიტიკური ელიტის მიერ“ (გვ. 15).

აღნიშნული თავი მოიცავს შვიდიოდე გვერდს (გვ. 17-23) და მასში დაფიქსირებულია ქართველი ერის ჩამოყალიბების მარქსისტულ-სტალინური

თვალსაზრისი. პირველ თავში ავტორმა გამოიყენა 9 ამონაწერი, ციტირება. პირველი ეკუთხის ილია ჭავჭავაძეს და XIX საუკუნის მეორე ნახევრისაა; მეორე 1911 წლის გაზეთ „ოქმიდანა“, მაგრამ ქართველების კუთხური მენტალობის თემას ეხება; მესამე ერთს სტალინური განსაზღვრებაა; მეოთხე XI საუკუნის წარწერაა; მეხუთე ვასუმტი ბატონიშვილის ციტატა; მეექვსე – ლენინის თხზულებებიდანაა ამონაწერი; მეშვიდე ციტატა – უან შარლენს ეკუთხის; მერვე 1819 წლის აღწერიდანაა ციტატა და მეცხრე – გრიგოლ ლორთქიფანიძის აზრია ციტირებული, რომლითაც ბოლშევიკებისაგან წამებული სოციალ-დემოკრატი, რუსეთის მეფის ხელისუფლების უკულმართ პოლიტიკას ეხება ქართველობის მიმართ.

რა მივიღეთ? ის, რომ ავტორმა დანაპირები არ შეასრულა და სრულიადაც არ „წარმოადგინა, თუ როგორ მოიაზრებოდა ქართველი ერის ჩამოყალიბება XX საუკუნის პირველი ოცნებულის ქართული კულტურული და პოლიტიკური ელიტის მიერ“ (გვ. 15).

იქნებ მეორე მიზანდასახულობა მაინც შეასრულა ავტორმა ამ თავში, რომლის შესახებაც ის ნაშრომის „დასკვნაში“ კატეგორიულად აცხადებს: „უარყოფილია XIX საუკუნის II ნახევარში ქართველი ერის ჩამოყალიბების მარქსისტული მოსაზრება და დასაბუთებულია საწინააღმდეგო თვალსაზრისი“.

უნდა მოვტებნოთ სადაა ის, რაც უარყოფილია და ის, სადაც „დასაბუთებულია“ ან იქნებ სადმე გამართულად გვითხრას ავტორმა, რა არის ეს „საწინააღმდეგო თვალსაზრისი“.

ამ განცხადების არც ერთი პასუხი ამ თავში და, საერთოდ, ნაშრომშიც არ არის.

ავტორი პირდაპირ არსად გვეუბნება, რომ არ იზიარებს მარქსისტულ თვალსაზრისს ქართველი ერის XIX საუკუნეში ჩამოყალიბების შესახებ. ის წერს: „...მაგრამ იმის თქმა, რომ ქართველი ერის ჩამოყალიბება კაპიტალიზმის დამკვიდრების შემდეგ იწყება, როცელი საოქმედია“ (გვ. 18).

ამას კიდევ ეშველება, რადგან ჩანს მაინც, რომ ავტორს ეჭვი ეპარება მარქსისტული თვალსაზრისის ობიექტურობაში, თუმცა გამოკვეთილად ვერ ამბობს თავის პოზიციას. არც ამ თავში და მით უფრო ნაშრომში იგი არსად არ „ასაბუთებს“ მარქსისტული კონცეფციის საწინააღმდეგო თვალსაზრისს. ამის მაგივრად ის მხოლოდ იმას ასაბუთებს, რომ „ქართული ერთობის წევრებს შორის კავშირი არსებობდა ყოველ ეპოქაში“ და რომ ერთიანობის „აღქმაც“ არსებობდა. ავტორი არსად არ ამბობს, წერს ან ასაბუთებს, რომ

ქართველი ერი XIX საუკუნეებდე არსებობდა.

ერთი სიტყვით, პირველი თავი აბსოლუტურად არ პასუხობს თემის დანიშნულებას, მისი შინაარის არ შეესაბამება ავტორის მიზანდასახულობას, მასში არ არის განხორციელებული პრობლემის აღეპვატური კვლევა.

კი, მაგრამ მაინც რის შესახებაა საუბარი პირველ თავში? მასში განხილულია: პირველი – ერის რაობისა და ერების წარმოშობის შესახებ მარქ-სისტულ-ლენინური თვალსაზრისი; მეორე – მოყვანილია ციტატები იმის დასადასტურებლად, რომ ქართველთა ერთიანობის შეგნება არსებობდა შუა საუკუნეებში და მესამე – რუსეთის ხელისუფლება მიზანმიმართულად აძლიერებდა ქართველთა შორის დაქართველობა კუთხურობას. ეს ყველაფერი კარგადაა ცნობილი ქართული ისტორიოგრაფიისთვის.

II თავის სათაურია „რეგიონული იდენტობა – ცენტრი და პერიფერია“. ავტორი განმარტავს, რომ მის მიზანს არ წარმოადგენს ქალაქისა და სოფლის ისტორიის „ტრადიციული ფორმით შესწავლა“. მისი მიზანია „მათი როლის წარმოჩენა ეროვნული სახელმწიფოს შენების, თავისუფლების და დამოუკიდებლობის აღდგენისათვის ბრძოლაში“. „...საინტერესოა, როგორ აღიქვამს და რა დატვირთვას ანიჭებს კულტურული და პოლიტიკური ელიტა ქალაქს და სოფელს 1900-1917 წლებში“. საინტერესო დასაწყისი და დაპირებაა. მართლაც, ამ კუთხით რომ შეეხდოს რეგიონისა და პერიფერიის როლისა და ადგილისათვის იმ პერიოდის საქართველოსთვის, ქართველი ისტორიკოსებიდან არავინ მახსენდება.

II თავი 12-გვერდიანია, საკითხის დასმა გვერდნახევარს მოიცავს. კვლევითი ნაწილი პერიოდის, ე.ი. XIX საუკუნის მეორე ნახევრისა და XX საუკუნის დასაწყისის კარგად ცნობილი პროცესების ახსნით იწყება. აქ მოუღობდება ავტორი შუა საუკუნეების ქალაქების ისტორიით ინტერესდება. ავტორი ჩამოთვლის 25 პატივცემული ქართველი ისტორიკოსის გვარს, ვინც კი ამ თემას შეხებია, შემდეგ კვლავ დაკონკრეტებულია აღნიშნულ თავში ავტორის მიზანი. ავტორთან ერთად ჩვენც გავიმეოროთ: „ამჯერად ჩემს მიზანს წარმოადგენს 1900-1917 წლების ქართული გარემოს აღდგენა, რისთვისაც დისერტაციაში განხილულ საკითხებთან ერთად მთლიანი სურათის აღსაღენად და მოვლენების ურთიერთკავშირში განსახილველად ცენტრის და პერიფერიის ანუ ქალაქის და სოფლის ეროვნული იდენტობის დამახასიათებელი ნიშნების გაზრებას და გამოკვეთას თავისუფლებისათვის ბრძოლაში დიდი მნიშვნელობა ენიჭება“ (გვ. 26).

ამის შემდეგ იწყება „§1. ქალაქი“. პარაგრაფს ავტორი ასე იწყებს: „ზოგადად ქალაქის მნიშვნელობა მთლიანად სახელმწიფოს და კონკრეტულად სოფლის განვითარებაზე დიდია“ (26). ამ წინადაღებას მწარედ დაფიქრება სჭირდება: იქნებ კორექტურული შეცდომა? თუ არა, მაშინ გვინდა ვთხოვოთ დისერტაცის (აწ უკვე დოქტორს – დ. შ), განვიმარტოს: როგორ არის ქალაქის მნიშვნელობა სახელმწიფოსაზე დიდი? ეს საკუთარი აზრია თუ იდენტობის რომელიმე თეორეტიკოსის ნაწერებში ამოიკითხა? თუ ასეა, მაშინ უნდა მიუთითოს ავტორი, წიგნი, გვერდი, რათა ჩვენი სამამულო ისტორიოგრაფია ახალი ფასეული დებულებით გამდიდრდეს.

ამას მოსდევს არანაკლებ საეჭვო ღირებულების მქონე შემდეგი განცხადება, რომ „1900-1917 წლებში საქართველოში ქალაქებს ახალი მნიშვნელობა და დატვირთვა ენიჭება. ის ხდება მთავარი ცენტრი, რომლის საშუალებითაც უნდა მოხდეს სოფლის მოსახლეობასთან დაკავშირება და დაახლოება, ...ამ პერიოდში ქალაქები მთავარი სამრეწველო ცენტრები ხდებიან...“ და ა.შ. ისტორიის თხრობისაგან ისტორია, როგორც მეცნიერება, იმით განსხვავდება, რომ იყო მოითხოვს დებულებებისა და პროცესების გადმოცემის სიზუსტეს. ავტორის დაწერილს რომ დავუჯეროთ, გამოიდის, ილია ჭავჭავაძე „ივერიას“ ყვარელში გამოიცემდა. ასე რომ, ავტორს არ ჰვონია ვიცით, მაგრამ წერის დროს დაფიქრებაა საჭირო და აზრის ადეკვატურად გადმოცემა. თბილისი, ქუთაისი და სხვა შედარებით პატარა ქალაქები კარგა ხანია, უკვე იყო ქვეყნისა და რეგიონების მთავარი ცენტრები, ვიდრე 1900 წელი დადგებოდა. ყველაფერი, რაზეც ამ თავში ქალაქებზე წერს ავტორი, ადრე დაიწყო, ხოლო სამრეწველო ცენტრებად უკვე XIX საუკუნის 80-90-იანი წლებიდან იქცა, მაგრამ XX საუკუნის დასაწყისში განვითარების ახალ ფაზას მიაღწია.

ნაშრომში კვლევის მიმდინარეობის ერთადერთი მაჩვენებელი ისაა, რომ ავტორს მოჰყავს ამონაწერები ქართული პრესის ორგანოებიდან. ჯერჯერობით ეს ერთადერთი დადგებითი მხარეა ნაშრომისა, მაგრამ რას ასაბუთებრ ეს ამონაწერები? „როგორც დღეისათვის არსებული მასალებიდან ჩანს, განსაკუთრებული დატვირთვა პქონდა თბილისა და ქუთაისს, რომლებიც მთავარი ცენტრები იყვნენ ეროვნული იდეების ქადაგების თვალსაზრისით“ (გვ. 29). აი, ამგვარი პრიმიტიული რეალობის დასასაბუთებლად კრებს ავტორი ამონაწერებს მაშინდელი პრესის ორგანოებიდან, თითქოს ეს ყველაფერი უცნობი იყოს ისტორიოგრაფიისათვის ან საზოგადოებისთვის.

გზადაგზა ავტორი უცნაურ დასკვნებს გვთავაზობს: „საინტერესოა, აღინიშნოს, რომ საუკუნის დასაწყისში თბილის არ პქონდა ის ეროვნული და კულტურული მნიშვნელობა, რაც XX საუკუნის დასაწყისდან შეიძინა“: ეტყობა, პირველ შემთხვევაში ავტორი XIX საუკუნეს გულისხმობს? აღბათ.

მაინც რას ასაბუთებს ავტორი იმ რვა ციტატით, რომელნიც მას ამოუწერია 1900-ანი წლების ქართული პრესიდან: პირველ ციტატაში საუბარია იმაზე, რომ ქალაქი პროვინციას განვითარების გეზს აძლევს (გვ. 26); მეორეში – რომ ქალაქი ცივილიზაციის გამომხატველია (გვ. 27); მესამეში – რომ აქ იქმნება პროგრესულ-დემოკრატიული მოძრაობა (გვ. 27); მეოთხეში – მრეწველობა და ვაჭრობა ვერ განვითარდება, თუ ქალაქის მცხოვრებელნი უვაცები არიან (გვ. 28); მეხუთეში – ქალაქის განვითარებისათვის საჭიროა სკოლა და განათლება (გვ. 29); მეექვსეში – თბილისის გარეშე საქართველო ვერ გაერთიანდება და განვითარდება (გვ. 29); მეშვიდეში – თბილისის არაეროვნული სახე აქვს (გვ. 29); თბილისი ერთადერთი ნამდვილი ცენტრია ქვეყნისა (გვ. 30).

ამ, ამ ამონაწერებით მთავრდება იმის კვლევა, რასაც ავტორი მეორე თავის დასაწყისში გვპირდება: რომ მან უნდა წარმოაჩინოს ქალაქების როლი ეროვნული სახელმწიფოს შენებაში; დამოუკიდებლობის აღდგნისათვის ბრძოლაში; ან კიდევ, რა როლს ანიჭებდა ქალაქებს „კულტურული და პოლიტიკური ელიტა“. ეს ამონაწერები და 3-4 ფურცელი, სადაც საუბარია ქალაქების მნიშვნელობაზე, სრულიადაც არ არის საკმარისი, რომ დაგვინახოს მაშინდელი საზოგადოებრივი აღქმა ქალაქების შესახებ. ავტორი იწერს ამონარიდებს სტიქიურად, იწერს იქიდან, სადაც, უბრალოდ, ქალაქებზეა საუბარი, არც ავტორებს ასახელებს, არც სტატიების სახელწოდებას, არც მასალის დანიშნულებას და არც იმას, თუ რას ასაბუთებს ესა თუ ის სტატია, რომელი საზოგადოებრივ-პოლიტიკური ჯგუფის პოზიციას გამოხატავს იგი და ა.შ. შედეგად ვიღებთ ციტატების უსისტემო გროვას. ასე პრიმიტიულად არ იყო XX საუკუნის დასაწყისში ვითარება. ქართულ პრესაში მიმდინარეობდა ცხარე და საინტერესო პოლემიკა პოლიტიკურ მხარეებს შორის ქალაქების როლისა და დანიშნულების შესახებ. ავტორი ამ საკითხით უნდა დაინტერესებულიყო და, მაგალითად, გაეშუქებინა ნოე ჟორდანიასა და არჩილ ჯორჯაძის კამათი ქალაქების დანიშნულების შესახებ და ამის მსგავსი რეალიები გადმოეცა. მაგრამ მან იმდენად არარეალისტური საკვლევი მიზნები დაისახა, რომ ქალაქებს მეტ ადგილს ვეღარ დაუთმობდა თავის დისერტაციაში. შედე-

გად მიგიღეთ რამდენიმე მჭერე ციტირება და ავტორისეული არაფრისმოქმედი, ისედაც საყოველოაოდ ცნობილი პროცესების ცუდად გამოირჩება და გადმოცემა.

რაც მთავარია, აღნიშნული პარაგრაფი სამეცნიერო-კვლევითი და ანალიტიკური ოვალსაზრისით არავთარ ღირებულებას და სიახლეს არ წარმოადგენს, მასში არ არის არც ერთი ახალი დებულება ან აზრი და ეს ხდება არა იმიტომ, რომ პრობლემის მართლაც სერიოზულად შესწავლა შეუძლებელია, არამედ იმიტომ, რომ ოთხი გვერდი პრობლემის წარმოსაჩენად სრულდად არაა საკმარისი.

მაგრამ ავტორმა პრობლემა საკმარისად შესწავლიდად მიიჩნია და მეორე საკითხის განხილვაზე გადავიდა შემდეგ პარაგრაფში, რომელსაც ეწოდება „**32. სოფელი**“.

შესაძლოა, უნებურად, მაგრამ, ფაქტობრივად კი, ავტორი პირველივე გვერდიდან ცდილობს მცდარი ფორმულირება რეალობად მოგვაჩვენოს: „1900-1921 წლებში ქართული კულტურული და პოლიტიკური ელიტა მოლიანად მიმართულია, ჩართოს სოფელი ეროვნულ პროცესებში...“ (გვ. 31). რაღა გვიჭირდა, ასე რომ მომხდარიყო და ასეთი ერთსულოვანი რომ ყოფილიყო ჩვენი მაშინდელი ელიტა. კარგად რომ იცნობდეს ჩვენი დისერტანტი „ეპოქის გამოწვევებს“, მაშინ დაწერდა, რომ ქართული პოლიტიკური ელიტის ყველაზე გავლენიანი ძალა, სოციალ-დემოკრატია, ცდილობდა სოფლის გლეხობის ჩართვას არა ეროვნულ, არამედ სოციალურ-რევოლუციურ პროცესებში და ამით უპირისპირდებოდა ეროვნულ-პოლიტიკურ ელიტას.

პარაგრაფში თემები კალეიდოსკოპური სიჭრელით ცვლიან ერთმანეთს: ფეოდალიზმი, კაპიტალიზმი, მიწების გამოჯვნა, მრავალფეროვანი წყაროების გამოყენების აუცილებლობა, ნაციონალური იდეები, ისევ მიწის პრობლემა, სწავლა-განათლების საქმე... აქ შეუძლებელია რაიმე ერთი თემის დაფიქსირება, აქ ქაოსია და ერთიანი აზრის გამოტანა შეუძლებელია. 34-ე გვერდზე ავტორი, ეტყობა, შეაწუხა სხვადასხვა თემის ქაოტურმა ცვალებადობამ და, ბუნებრივია, აქ ყველა სტატიას ვერ განვიხილავთო, დაპირებას იძლევა: „აქცენტს გავაკეთებ ძირითად პრობლემებზე და საზოგადოებისათვის საინტერესო მოვლენებზე, რომლებიც აქტუალური იყო აღნიშნულ ეპოქაში და რომელებიც ნათლად გამოხატავენ სოფლის მცხოვრებლების სულისკვეთებას და მოთხოვნილებებს. ამასთან, მათ აღქმას, როგორც ეროვნული იდეისა, ასევე საზოგადოებრივი საკითხებისა“ (გვ. 34). ამ მეოთოდოლოგიურ განცხადებაში ჩანს მთავარი პრობლემა: ავტორი გამოკვეთილად ვერ აკეთებს არჩევანს –

რომელ საკითხზე გაამახვილოს მთავარი ყურადღება. იგი ახსენებს თავის მთავარ მიზანს – სოფლის მცხოვრებლების მიერ აღქმა ეროვნული იდეისა, მაგრამ მასთან ერთად უამრავ სწავა საკითხსაც ჩამოთვლის, რომელთა შესახებაც არ არის საჭირო საუბარი, ამონაწერების გაკეთება, მსჯელობა. მაშინ-დღლ გლეხობას, და, ზოგადად, სოფელს მდენი „აქტუალური“ საკითხი აწუხებდა, რომ ტომები დაიწერება. ეს მეცნიერული კვლევის ელემენტარული მეთოდია და თუ ის დაცული არ იქნა, ნებისმიერი ავტორი სხვადასხვა თემის ისეთ აბლაბუდაში გაებმება, რომ იქიდან დღოდადრო თუ დაიძრენს ხოლმე თავს.

ჩვენს ავტორს სწორედ ასე ემართება, ამ პარაგრაფშიც და ნაშრომშიც მის მეთოდოლოგიურ ამონაწერში გაელვებული „ეროვნული იდეა“ აქამდე ჩაკარგული იყო „ყველა პრობლემაში“. ამის შემდეგაც ავტორის ყურადღებას იქცევს ქურდობა, რომლის გამოც „მძიმე ვითარებაში“ ყოფილა ზემო ქართლი, მორიგი ამონაწერიც ამ თემას ეხება. გაზეთ „თანამედროვე აზრიდან“. შემდეგი ამონაწერი უკვე სოფლად გავრცელებულ დღეობებს ეხება, რომლებიც, იმავე „თანამედროვე აზრის“ დასკვნით, „ოჯახის გამანადგურებელი“ ყოფილა. ნამდვილად კომპეტენტური დასკვნაა და არა მარტო 1900-იანი წლებისათვის, მაგრამ რა შუაშია და რა კავშირშია ეროვნულ იდენტობასთან ეს დობე-ყორე? ან იქნებ ის იგულისხმება, რომ იმ დალოცვილ სოფლის დღესასწაულებზე გლეხკაცები მამულის სადღეგრძელოსაც აუცილებლად იტყოდნენ.

პარაგრაფის დარჩენილი, ერთ გვერდზე მოყვანილი ციტატა კლასობრივ ბრძოლას ეხება, რის გამოც სოციალ-დემოკრატიული „თანამედროვე აზრი“ კმაყოფილებას ვერ მალავს, რადგან სოციალური დიფერენციაცია ღრმავდება (გვ. 35).

რა მივიღეთ ამ პარაგრაფში? აღდგა სოფლის გარემო? გავიგეთ თუნდაც ერთი წინადაღებით, როგორი იყო სოფლის მოსახლეობის მიერ ეროვნული იდეის აღქმა? რომელი სოციალური ფენებისაგან შედგებოდა სოფლის მოსახლეობა? როგორი დამოკიდებულება ჰქონდათ ერთმანეთთან? რას აკეთებდა სოფლად პრაქტიკულად, როგორც ნაშრომში ლამის ყოველ გვერდზეა ნახსენები, „ქართული კულტურული და პოლიტიკური ელიტა“? ამ და მსგავს კითხვებზე პარაგრაფი პასუხს არ იძლევა და დუმს. ეს კი იმას ნიშნავს, რომ აღნიშნულ პარაგრაფში არ არის არავითარი სიახლე, დასკვნა, მოვლენის ინტერპრეტაცია, რაც დისერტაციას უნდა განასხვავებდეს ჩვეულებრივი სამაგისტრო ნაშრომისაგან.

რაც შეეხება დასკვნას, რომელიც პარაგრაფის ბოლოშია გაკეთებული და ეხება ორი პერიოდის, 1900-1917 და 1917-1921 წლების მონაკვეთების ერთმანეთისაგან განსხვავდებას, ის საერთოდ არაა დაკავშირებული პარაგრაფის შინაარსთან. პარაგრაფში საერთოდ არაა ნახსენები დამოუკიდებელი საქართველო და მით უფრო პირველი რესპუბლიკისდროინდელი სოფელი, მისი პრობლემები და მისი საზოგადოებრივი აღქმა. დასკვნა საერთო ისტორიოგრაფიული ცოდნიდან გამომდინარეობს და არ ეყრდნობა სპეციალურად ჩატარებულ კვლევას. ერთი სიტყვით, ნაშრომში ვერ „აღდგა“ 1900-1921 წლების ვერც სოფელი და ვერც ქალაქი, რომლის მნიშვნელობაც „მთლიანად სახელმწიფოს“ მნიშვნელობაზედაც კი დიდია (26). ამ არცოუ სახარბიელო სურათის შემდეგ გადავიდეთ დისერტაციის ახალ ნაწილზე.

თავი III. სოციალური გარემო 1900-1921 წლებში. §1. გლეხი.

ავტორს აინტერესებს: „რა ცვლილებებს განიცდის მისი (გლეხის – დ. შ.) ლირებულებები. რაძღვნად აქვს განვითარებული ეროვნულობის შეგნება?“. ავტორი სრულიად სამართლიანად იწუნებს საბჭოთა ისტორიოგრაფიის პროდუქციას გლეხობის შესახებ და თუ ის პასუხს გასცემს თავის მიერ დასმულ კითხვებს, ეს იქნება მართლაც სიახლე, რადგან ამ თემაზე ბევრი წერდა, მაგრამ რას ფიქრობდა ჩვენებური გლეხები საკუთარ სამშობლოზე, ნაკლებად ვიცით.

თუმც პარაგრაფი უფრო გლეხის შესახებ სოციალ-დემოკრატიული პარტიის შეხედულებებისა და პოზიციის განხილვას ეხება. დისერტანტს მიაჩნია, რომ XIX საუკუნის პირველი მესამედის „ოთოქმის ყველა გამოსვლას საფუძვლად ედო არა ეროვნული, არამედ სოციალური და ეკონომიკური მოტივი, თუ არ ჩავთვლით 1832 წლის შეთქმულებას“ (გვ. 40). რაც ნიშნავს, რომ XIX საუკუნის დასაწყისის აჯანყებებს ეროვნული მოტივაცია და მიზნები არ ჰქონიათ. როგორც ვხედავთ, ავტორი განხრას თუ უნგრებლიერ იზიარებს მარქსისტულ-ლენინურ თვალსაზრისს და აქტიურად იმოწმებს საბჭოთა ისტორიოგრაფიის წარმომადგენლებს (გვ. 40).

ამის შემდეგ, ავტორი უფრო ამახვილებს ფურადღებას სოციალურ საკითხებზე, რომლებსაც სოციალ-დემოკრატიული პარტია მთავარ საზრუნვად მიიჩნევდა. ამონაწერებიც 42-43-ე გვერდებზე ამ თემას ეძღვნება. ჯერჯერობით ეროვნული იდენტობის თემატიკა არ ჩანს და არც გარემოს „აღდგენა“, ხოლო ენთონი სმიტის, ანდერსონისა და ჰობსბაუმის გვარების მაგივრად უფრო საბჭოთა ისტორიკოსების გვარები ფიგურირებენ ნაშრომში. საერთოდ, ეს

ფურცლები უფრო XX საუკუნის 50-60-იანი წლების პარტიული დიტერატურის პათოსით სუნთქვს, ვიდრე თანამედროვე დასავლური თეორიების გაგლენით.

დისერტანტს მიაჩნია, რომ საქართველოს დამოუკიდებლობის ხანაში გლეხის საკითხი კვლავინდებურად აქტუალური იყო და „მთავარი პრობლემა ისევ მიწა და პირადი თავისუფლებაა“ (გვ. 46). არა, იმაში ეჭვს ვერ შევიტანთ, რომ დისერტანტმა იცის ბატონყმობის გაუქმების თარიღი, მაგრამ მას ნამდვილად აქვს მოსაზრების ან მოვლენის აღვევატურად გადმოცემის პრობლემა. ამ შემთხვევაში ის ისე წერს, თოთქოს ნოე უორდანიას პრემიერ-მინისტრობის დროს ქართველი გლეხები ყმები იყვნენ და პირადი თავისუფლება არ გააჩნდათ.

პარაგრაფის ბოლო სამი გვერდი პირველი რესპუბლიკის ხანას ეთმობა. განხილული თემები ერთმანეთს ცვლიან: მიწის რეფორმა; ეკონომიკური მდგომარეობა; უორდანიას სურვილი გლეხობის სახელმწიფო პროცესებში ჩართვის შესახებ; რამიშვილის მოხსენება, საიდანაც ცხადი ხდება, რომ „გლეხები ეჩვევიან პარტიულ მუშაობას“; „ისინი პირდაპირ აღმეროვებენ ნოე უორდანიას, ჩხეიძეს და წერეთელს“. ამნაწერები საინტერესოა, მაგრამ სხვა თემისთვის უფრო კარგი გამოსაყენებელია და ნაკლებად ეროვნული იდენტობის თემატიკისათვის. ფურცლები ივსება სოციალ-დემოკრატიული მმართველი პარტიის საგლეხო პოლიტიკის განხილვით. თუ მკითხველს ეს თემატიკა აინტერესებს, მას ხომ შეუძლია შოთა ვადაჭკორიას ფუნდამენტური მონოგრაფია წაიკითხოს (იხ., მისი: ქართული სოციალ-დემოკრატია 1917-1921 წლებში. თბ., 2001).

პარაგრაფსა და, საერთოდ, ნაშრომში ხშირად გვხვდება მცდარი, არა-კომპეტენტური, ფაქტობრივი შეცდომების შემცველი ფორმულირებები. მაგ., 39-ე გვერდზე ვკითხულობთ, რომ თითქოს „ქართული სოციალ-დემოკრატია თავიდან, ანუ მოღვაწეობის საწყის ეტაპზე ანტიქართულ პოზიციაზე იდგა...“ დისერტანტს ვეკითხებით: მხოლოდ საწყის ეტაპზე? იგი ხომ თვითვე გვიწერს, რომ სოციალ-დემოკრატიამ პოზიცია შეიცვალა „განსაკუთრებით მაშინ, როდესაც 1918 წელს...“ რა გმოდის?! საწყის ეტაპზე კი არა, მოელი 25 წლის განმავლობაში ქართულ სოციალ-დემოკრატიას 1890-იანი წლებიდან 1917 წლამდე ანტიეროვნული პოზიცია პქონდა და ბოლო ეტაპზე განიცადა ნაციონალზარი, განსაკუთრებით მას შემდეგ, რაც დამოუკიდებელი საქართველოს ხელისუფლების სათავეში აღმოჩნდა.

რაც მთავარია, ეს თავიც უფრო სხვათა მიერ, ძირითადად კი სოციალ-დემოკრატების მიერ, გლეხობის შესახებ მოსაზრებებითა და ამონაწერებითაა გაგსებული. არსად ჩანს, თვით გლეხები როგორ აღიქვამდნენ ეროვნულ საკითხს. რა დონის, ხასიათის, ხარისხის ეროვნული იდენტობა პქონდათ. ამის შესახებ უამრავი ციტატა დუმს და ეს კი იმას ნიშნავს, რომ კვლევა სულ სხვა გზითაა წარმართული. ამ პარაგრაფში ერთადერთ ციტირებას წაგინიჭდით, რომელიც გლეხთა მიერ მიმდინარე მოვლენების აღქმას ეხება, მაგრამ ისიც არა ეროვნულ იდენტობას. აქ ლაპარაკია გლეხთა დამოკიდებულებაზე მენტევიკებისა და „ბალშევიკების“ მიმართ (გვ. 48).

პარაგრაფის დასკვნაც, ჩვეულებრივ, უცნაურია. ის კვლევის შედეგებს კი არ ეხება, არამედ იმას, თუ როგორ უნდა განხორციელდეს კვლევა. დისერტანტი თითქოს სხვებს აძლევს დარიგებას, რა და როგორ უნდა იკვლიონ. მოვუსმინოთ: „ამდენად, 1. ყოველივე ზემოთქმულიდან გამომდინარე, საქართველოს ისტორიის სრულყოფილად და დეტალურად შესასწავლად აუცილებელ საჭიროებას წარმოადგენს სხვადასხვა სოციალური ფენების ცნობიერების შეფასება და მათი დამოკიდებულება ეროვნულ, სოციალურ, პოლიტიკურ, სახელმწიფოებრივ საკითხებთან დაკავშირებით, 2. 1900-1921 წლების სხვადასხვა მოვლენების გასათვალისწინებლად ეპოქის გამოწვევები და საზოგადოების ცნობიერების ცვლილება“ და ა.შ. გასაოცარია, მაგრამ არც პირველ და არც მეორე საკითხზე პარაგრაფში არაფერია ოქმული.

დავასკვნით, რომ პარაგრაფის შინაარსი და კვლევა არ პასუხობს ძირითად თემატიკას. მასში ერთი სიტყვაც არაა თქმული გლეხის ეროვნულ-იდენტობრივი ღირებულებების შესახებ: რა ადგილი ეკავა მის ცნობიერებაში სახელმწიფოებრივი დამოუკიდებლობის, ეროვნული თავისუფლების პრობლემას; პარაგრაფი ძირითადად გადმოვცემს ქართულ ისტორიოგრაფიაში კარგად ცნობილ სოციალ-დემოკრატიულ პოზიციებს და ნაწილობრივ ინტელიგენციის შეხედულებებს გლეხობის ყოფა-ცხოვრების შესახებ. განა არ არის ნამუშევარი?! პრობლემაც სწორედ ისაა, რომ დისერტანტმა საკმაოდ ბევრი იმუშავა, პრესაც დაამუშავა, 19 ციტატაც მოიყვანა პრესიდან და საარქივო მასალებიდან, მაგრამ მისი მოაპოვარი, გამომზეურებული ამონაწერები სხვა თემატიკას ეხება და არა ეროვნულ იდენტობას, გლეხკაცის ეროვნულ აღქმებს.

„§2. პროლეტარიც“ ისტორიის სიღრმიდან, ყირიმის ომისა და ბატონიუმბის გაუქმების დროიდან იწყება. ისევ კაპიტალიზმის განვითარების, პროლეტარიატის წარმოქმნის პროცესს გავდივართ, ისევ „ახალი მოთხოვნები და

გამოწვევები დადგა დღის „წესრიგში“ (გვ. 51). 52-ე გვერდზე კვლავ უცოდინრობის რეციდივმა იჩინა თავი: პროკლამაციები საქართველოშიც ვრცელდებოდა „ქართული სოციალ-დემოკრატიული პარტიის მეშვეობით“. გავახსნებოთ აგტორს, რომ 1918 წლის 19 ნოემბრამდე, უორდანიასა და მისი ამხანაგების დაბალი ეროვნული იდენტობის ხარისხის წყალობით დამოუკიდებელი ქართული სოციალ-დემოკრატიული პარტია არ არსებობდა. არსებობდა მხოლოდ „რსდმპ“ და მისი შემადგენელი ნაწილი – საქართველოს ადგილობრივი სოციალ-დემოკრატიული ორგანიზაციები.

შემდეგ საუბარია: სოციალ-დემოკრატებზე, პროლეტარულ სოციალიზმზე, რევოლუციაზე, ციტირებებიც შესაბამისია. ავტორი თავისი დისერტაციანად თანდათან ეხვევა მარქსისტულ-ლენინური იდეოლოგიური ტერმინებისა და დოქტრინების ქსელში, სადაც აღარც ეროვნულ-იდენტური თემატიკა ჩანს და ადარც დისერტაციის მიზანი. მის ნაცვლადაა: ტერმინ „პროლეტარის“ მარქსისტული დეფინიციები (გვ. 52-53), კერძო საკუთრების უარყოფა; სოციალიზმის გამარჯვება; ამას მოსდევს პროლეტარიატის ჰეგემონობის ლენინური ლოზუნგის ციტირება; მერე 1959 წელს გამოცემული ძველისძველი საბჭოთა ავტორის, კ. დოლიძის წიგნიდანაა ციტირება. საბოლოოდ იკვეთება სოციალ-დემოკრატიული მოძრაობის პრიორიტეტული გაშუქება, რამაც ჩვენს ავტორს სრულიად გადავიწყა დასავლელი იდენტოლოგები და საბჭოთა მარქსისტ-ლენინელ ავტორებამდე მიიყვანა: აქვეა მეორე, უფრო მოზრდილი ციტატა კ. დოლიძის ზემოაღნიშნული წიგნიდან, შოთაშექდავი სათაურით: „ბურუჟუაზიულ-დემოკრატიულ რევოლუციაში პროლეტარიატის ჰეგემონობის საკითხისათვის“.

ნაშრომის ეს ნაწილი აღარაფრით განსხვავდება 1950-1960-იანი წლების საბჭოთა პარტიული ლიტერატურისაგან. 56-ე გვერდზე ნაშრომში ციტირებულია ამ პერიოდის ძველნაცნობი ლენინური თეზისი: „ამ ორი რევოლუციის შუალედში ბოლშევიკების პარტიამ გასწია დიდი მუშაობა იმისათვის, რომ ფართო დემოკრატიულ მასებს აეთვისებინათ პირველი რევოლუციის გაკვეთილები“. ამ ფურცლებზე ყველაზე მეტჯერ დამოწმებულ ავტორ-ავტორიტეტად გვევლინება ზემოაღნიშნული კარლო დოლიძე, რომლის მორიგ ციტირებასაც აქ აღარ მოვიყვანო (გვ. 57). საერთოდ, კარლო დოლიძის მივიწყებულმა პერსონამ და წიგნმა ნამდვილ უკვდავყოფას მიაღწია დისერტაციაში და მეოთხე ციტატას სახით დამკვიდრდა იმავე 57-ე გვერდზე. ასეთი პატივი დისერტაციაში იშვიათად თუ ერგო რომელიმე სხვა ავტორს.

განვაგრძოთ ჩვენი უხალისოდ ქცეული საქმე. ეროვნულ თემატიკაზე მხოლოდ რამდენიმეგან გვხდება საუბარი, პირველად 59-ე გვერდზე, როცა საკითხი ეხება რუსთავა და საქართველოში მუშათა შორის არსებულ ეროვნულ სხვაობას და მეორეგან 63-ე გვერდზე მოყვანილ ამონაწერებში, როცა მუშები გარკვეულ ეროვნებას აკუთვნებენ თავს. აქაც ავტორი არ განმარტავს, რომ ციტირებული გაზეობი „საქართველო“ და „შრომა“ – სოციალისტ-ფედერალისტებს ეკუთვნოდათ. მკითხველს ისინი სოციალ-დემოკრატებისა ეკონება, რადგან კონტექსტის მიხედვით სოციალ-დემოკრატებზეა საუბარი.

პარაგრაფის უკანასკნელ გვერდებზე იწყება საუბარი პირველი რესპუბლიკის ხანაზე, როცა „სოციალ-დემოკრატებმა შეცვალეს თავიანთი პროგრამა“ ეროვნულ სფეროში. მაგრამ ამის დასადასტურებლად ავტორის მოჰყავს ამონაწერი 1920 წლის გაზეოთ „სახალხო საქმიდან“. აქაც ავტორს უნდა მიეთოთებინა, რომ „სახალხო საქმე“ სოციალისტ-ფედერალისტების პარტიული გაზეთი იყო და არა სოციალ-დემოკრატებისა, როგორც მკითხველს შეიძლება ეგონოს, რადგან კონტექსტის მიხედვით კვლავ სოციალ-დემოკრატებზეა საუბარი.

ყოველ შემთხვევაში, მაინც უნდა აღვნიშნოთ სასიკეთო ტენდენცია, რომ პარაგრაფის დასასრულს ნაშრომის შინაარსი ოდნავ მაინც მოუახლოვდა ეროვნულ თემატიკას, სოციალ-დემოკრატების ეროვნულ ტრანსფორმაციას და მსგავს საკითხებს. დაასკრის კიდევ ავტორი, რომ „აქედან მოყოლებული უფრო მეტი ყურადღება ექცევა მუშების ეროვნული თვითშეგნების ამაღლებას“ (გვ. 66). აი, რისოვის უნდა მიეცია დისერტაცის ყურადღება პარაგრაფის პირველი შვიდი ფურცლის გვერდებზე. კერძოდ, მას უნდა გახსენებოდა, რომ 1900-1917 წლების პერიოდში ქართული სოციალ-დემოკრატიის რიგებში იყვნენ ეროვნული მიმართულების მოღვაწეებიც, იყო შესაბამისი პრესაც და იყო შესაბამისი ეროვნული მიმართულების ფრაქციებიც.

დავასკვნით: პარაგრაფ „პროლეტარში“ უმეტესწილად საუბარია სოციალ-დემოკრატიულ მოძრაობაზე, ორგანიზაციებზე, მათ სოციალურ მიზნებზე, მხოლოდ პარაგრაფის დასკვნით ნაწილში, 64-69-ე გვერდებზეა საუბარი ეროვნულ თემატიკაზე (ფრაგმენტულად 59-ე გვერდზეც), რომელიც 1918-1921 წლების პერიოდს ეხება. თემატიკის ამგვარი განაწილება და ბალნის აშკარად არაა საკმარისი, რომ აღნიშნული პარაგრაფი ეროვნული იდენტობისადმი მიძღვნილი დისერტაციის ნაწილად მივიჩნიოთ. პარაგრაფი საერთოდ არაა ნახსენები და ნაჩვენები თვით ქართველი მუშა-პროლეტარის ეროვნული დირექტულებები, აღქმები, მრავალრიცხოვანი ციტატებიდან ერთიც

არ ეხება ქართველი მუშის ეროვნულ შეხედულებებს, რაც დისერტაციის მთავარ მიზანსა და დანიშნულებას წარმოადგენს. ეს პარაგრაფი მხოლოდ ქართველი სოციალ-დემოკრატიული მოძრაობისა და შემდეგ ხელისუფლების ისტორიის ეპიზოდებს ეხება.

დისერტაცის უნდა შეესწავლა ქართველი მუშა-პროლეტარის ეროვნული შეხედულებები, ღირებულებები – ეს იქნებოდა მართლაც სიახლე და ნაშრომიც საინტერესო სახეს მიიღებდა. ამ სახით აღნიშნული პარაგრაფი, ისევე როგორც წინამდებარე ნაწილები, რამდენიმე თემატიკის ფრაგმენტების უწესრიგო კრებულს წარმოადგენს, სერიოზული, მრავალრიცხოვანი შეცდომების, ფორმულირებების, მარქსისტულ-ლენინური დოგმების რეციდივების თანხლებით, რომელთა შორის ოაზისებივთ გახვდება საინტერესო ამონაწერები იმდროინდელი უმდიდრესი ქართული პრესიდან, რომელნიც დისერტაციის კვლევით ნაწილს კი არ წარმოადგენს, არამედ სხვადასხვა თემატიკის სადისერტაციო მასალებს.

8 ფურცლიანი „„ჯარისკაცი“ უნიკალურია დისერტაციის წინაგანხილული ნაწილებისაგან განსხვავებით – ის დისერტაბელურია, ე.ო. დისერტაციის თემატიკას პასუხობს. საუბარია პირველი რესპუბლიკის პერიოდის ქართველი ჯარისკაცის ეროვნული ცნობიერების, განწყობის შესახებ. ამონაწერებიც შესაბამისია, მაგ., განერალ გიორგი კვინიტაძის შეფასებები ქართველი ჯარისკაცების ფიქოლოგიური განწყობის, ბრძოლისუნარიანობის შესახებ (გვ. 73) და სხვ. დისერტაციაში საუბარია ჯარისკაცებში გავრცელებული დეზერტირული ფიქოლოგიის, სხვა მანკიერებების შესახებ, საიდანაც გამომდინარეობდა ხელისუფლების ამოცანა – ეროვნული თვითშეგნების გაღლიერება არმიაში, „თითოეულ მხედარში სამშობლოსადმი სიყვარულის“ ჩანერგვა (გვ. 76).

პარაგრაფში მოძიებულია საინტერესო და ადეკვატური მასალები, მაგ., დამფუძნებელი კრების გადაწყვეტილება ორი სამხედრო სკოლის შექმნის შესახებ; ინსტრუქტორების ინსტიტუტის ორგანიზება, მასწავლებლების მიმართ ჯარისკაცებთან, ბიბლიოთეკების გახსნა, საქართველოს ისტორიის, ლიტერატურის სწავლება და სხვ. ყოველივე ამის შესახებ მოძიებულია საარქივო და პრესის მასალები. სხვა ნაწილებისაგან სრულიად განსხვავებულ ამ პარაგრაფში განხილული საკითხები პირდაპირ პასუხობენ დისერტაციის დანიშნულებას: ჯარისკაცთა სწავლება, წერა-კითხვა მშობლიურ ენაზე, პატრიოტული აღზრდა, დასგნაც ავტორისა ადეკვატურია: ხელისუფლება ცდი-

ლობდა შეექმნა ბრძოლისუნარიანი არმია, ჯარისკაცში აემაღლებინა ეროვნულ-სახელმწიფოებრივი თვითშეგნება, მაგრამ საამისოდ სამი წელი არასაკმარისი აღმოჩნდა (გვ. 84).

შენიშვნები ამ პარაგრაფის მიმართაც გვაქვს, მაგ., აქაც გვხვდება არარისებული „ქართული სოციალ-დემოკრატიული პარტია (გვ. 71); აქაცაა ბუნდოვანი წინადადებები; აქაცაა ბევრი საუბარი სოციალ-დემოკრატიულ მოძრაობაზე. ერთ მთავარს მაინც აღვნიშნავთ: ამ პარაგრაფში, ხელისუფლების მიერ გატარებული ღონისძიებების გარდა, ბევრად მეტი ყურადღება უნდა დაომობოდა თვით ჯარისკაცთა განწყობის გამომხატველ შეხედულებებს, მათ ეროვნულ ღირებულებებს, მათ დამოკიდებულებას ეროვნული საკითხის, სახელმწიფოს, დამოუკიდებლობის მიმართ. გაუგებარია, რატომ არიდებს თავს დისერტანტი იმას, რაც დისერტაციის მთავარ დანიშნულებას წარმოადგენს. ამ შემთხვევაში ხომ მას „ჯარისკაცის ცნობიერება“ უნდა შექმნავლა. ამის შესახებ პარაგრაფში ერთი ამონაწერიც არ არის.

არ გვინდა დადგებითი განწყობა ამ პარაგრაფის მიმართ დავარღვიოთ და უნდა აღვნიშნოთ, რომ ნაშრომის ეს ნაწილი მაინც პასუხობს დისერტაციის ოქმატიკას. მხოლოდ ისაა დასადგენი, თუ რამ გამოიწვია, რომ ამ ნაწილში დისერტანტმა ნაწილობრივ მაინც შეძლო აღეკვატური კვლევის განხორციელება, რასაც ის ვერ ახერხებდა დისერტაციის წინა ნაწილებში.

„**44. სამღვდელოება**“ მორიგი დაპირებით იწყება: „მაგრამ არსად არ გვხვდება ცნობები იმის შესახებ, თუ როგორ აღიქვამდა საკუთარ თავს სამღვდელოება 1900-1921 წლებში და რა განაპირობებდა იმ ცვალებად და არაერთგვაროვან დამოკიდებულებას საზოგადოების მხრიდან მათი მისამართით“ (გვ. 85).

ამის ნაცვლად პარაგრაფში შემდეგ თემებზე საუბარი: დედაენაზე სწავლების საჭიროება; სამღვდელოების ორგანოს გაზეთ „სიტყვის“ გამოსვლა-პროგრამა; ქართული სამღვდელოების მძიმე მდგომარეობა; ავტოკეფალისტური მოძრაობა; ანტონ II; ნაციონალური სიმბოლოების რუსიფიკაცია... მხოლოდ 89-ე გვერდიდან იცვლება ვითარება, პარაგრაფი „თავის თავს“ უბრუნდება და ენისა და ეროვნული ცნობიერების დაცვის შესახებ იწყებს საუბარს. პარაგრაფში მოყვანილი 16 ციტატიდან ექვსი დისერტაციის თემატიკას ეხება: ქართველი მღვდელმსახურების ცდები, ებრძოლათ ექლესიის ავტოკეფალიის აღდგენისათვის, ქართული ენის სწავლების გაძლიერებისათვის, მშობლიურ ენაზე საეკლესიო ლიტერატურის შექმნისათვის და სხვ.

ახლა დავსვათ კითხვა: რას გვაძლევს წინამდებარე პარაგრაფი? ესაა კარგად ცნობილი მოვლენების ფრაგმენტული ჩამოთვლა-კონსტატაცია. ერთა-დღროი სიახლე ეს არის პრესაში მოძიებული ახალი ამონაწერები, რომლებითაც ძველი დებულებებია ხელახლა დასაბუთებული. იქნებ ესაა ავტორისეული ე.წ. „კომპლექსური ანალიზი“? ამ ნაშრომის მიხედვით თუ ვიმსჯელებთ, კომპლექსური ანალიზი არის სხვადასხვა კარგად შესწავლილი საკითხის, თემის შესახებ 15-დან 20-მდე ფრაგმენტის ციტირება 1900-იანი წლების უმდიდრესი პრესიდან, რომელიც ნებისმიერი თემის შესახებ მასალას უხვად მოგაწვდით, მაგალითად, იმის შესახებაც, თუ როგორ მიმდინარეობდა აფრიკაში მარტორქებზე ნადირობა.

დისერტაციის 94-ე გვერდზე სიტყვებით: – „ინტერესმოკლებული არ უნდა იყოს თავადაზნაუროა ცნობიერების და ფუნქციების ცვლილებების შეფასება და გათვალისწინება“, – იწყება „§5. თავადაზნაურობა“. მართალს ბრძანებს ავტორი, რომ სპეციალური ნაშრომი ამ საკითხზე არ არსებობს, ე.ი. საბჭოთა ისტორიკოსები არ დაინტერესებულან, რომ შეემნათ ასეთი მონოგრაფია: „ქართველი თავადაზნაურობა ამა და ამ წლებში“. მაგრამ მონაცემები ბლომდაა სპეციალურ ლიტერატურაში. ამიტომ ის, რაზედაც წინამდებარე პარაგრაფია საუბარი – ქართველ თავადაზნაურობაზე, ესეც კარგად ცნობილი ინფორმაციის ჩვეული კონსკექტურებაა: რუსეთის გაბატონების შემდეგ ქართველი თავადაზნაურობის როლის დაკარგვა; უფლებების დაკარგვა; საკრებულოს შექმნა (გვ. 96-97); ამ პროცესების რამდენიმეჯერ გამეორება; ანტირუსული გამოსვლები; ბატონიშვილის გაუქმება და თავადაზნაურობა „ახალი გამოწვევის“ წინაშე...

უკვე 99-ე გვერდზე ვართ და ძლივს მოვალწიეთ XX საუკუნის დასაწყისამდე, ხუთი ფურცელი ისე დაიკარგა, რომ ნაშრომი მთავარ თემას არ შეხებია. 1900-იანი წლები თავადაზნაურობის ეკონომიკური მდგომარეობის განხილვით იწყება, ხოლო ვრცელი ამონაწერი „ცისკრიდან“ ისევ XIX საუკუნის თავადაზნაურულ „ნაციონალურ მოძრაობას“ განმარტავს სოციალ-დემოკრატიული პოზიციიდან, რადგან „ცისკარი“ სოციალ-დემოკრატიული ორგანოა, თუმცა ნაშრომში ეს არაა მითითებული.

შეცდომაა განცხადება იმისა, რომ „1900 წლიდან ბეჭდურ მედიაში თავადაზნაურობის აშკარა კრიტიკა იწყება“ (გვ. 100). თავადაზნაურობის, როგორც წოდების, კრიტიკა ჯერ კიდევ ქართველმა ხალხოსნებმა დაიწყეს XIX საუკუნის 80-იან წლებში, ხოლო ქართველმა სოციალ-დემოკრატმა „მე-

სამე დასელებბა“ 1894-1895 წლებიდან გაზეთ „კვალის“ ფურცლებიდან გააფორმებით შეუტიეს თავადაზნაურობასაც, ბურჟუაზიასაც და მათ ინტელიგენციაც მიაყოლეს. ესეც ქრესტომათიული ანაბანაა, რასაც მაგისტრატურის წლებში სწავლობენ მომავალი ისტორიკოსები.

შემდეგი ამონაწერებიც თავადაზნაურობის საზოგადოებრივ მდგომარეობას, როლს და ადგილს არკვევს და არა მის ეროვნულ ღირებულებებს. არ ვიცით, რას გულისხმობს ავტორი „საზოგადოებრივ აღქმებში“, მაგრამ ეს ამონაწერები უმეტესწილად პოლიტიკურ პარტიებს ეკუთვნით: „ცნობის ფურცელი“ და „სახალხო გაზეო“ ფედერალისტებისაა, „კვალი“ სოციალ-დემოკრატებისა (100-102 გვერდები). თუ პოლიტიკური პარტიების „აღქმები“ ნიშნავს საზოგადოებრივ აღქმებს, განა ეს პრიბლევა, ე.ი. პოლიტიკური პარტიების პოზიციები საქართველოს სოციალური ფენების შესახებ, არაა შესწავლილი ქართულ ისტორიოგრაფიაში, კერძოდ, ვ. გურულის, ო. ჯანელიძის, დ. შველიძის ნაშრომებში? წინამდებარე დისერტაციაში კი ციტირებათა აბსოლუტური უძრავლესობა სწორედ პოლიტიკური პარტიების პრესიდანაა ამოწერილი ისე, რომ ავტორი თითქმის არასოდეს უთითებს გაზეობის პარტიულ კუთვნილებას.

გაუგებარია, რაზე დაყრდნობით აკეთებს ავტორი საკვლევი პერიოდის რეალობის სრულიად საწინააღმდეგო არააღეკატურ დებულებებს: „1900-1917 წლებში, – წერს ის, – მიმდინარეობდა ბრძოლა არა მხოლოდ რუსეთის თვითმპყრობელობის წინააღმდეგ, რაც პირველ რიგში კულტურით, განათლებით ბრძოლას გულისხმობდა...“ (გვ. 102). არ არის სწორი: ქართული საზოგადოების მნიშვნელოვანი ნაწილი თვითმპყრობელობის წინააღმდეგ შეიარაღებულ ბრძოლას აწარმოებდა და ამ რეალობის დასადასტურებლად ფაქტების მოყვანა მგონი საჭირო არაა, აღბათ, ავტორს უკვე გაახსენდა 1905-1907 წლების რევოლუცია და არა მარტო ის. გარდა ამისა, რევოლუციური ბრძოლა, გარდა შეიარაღებული ბრძოლისა, გულისხმობს გაფიცვებს, დემონსტრაციებს, ბოიკოტს და ათას სხვა საშუალებას, რაც სცილდება მხოლოდ „კულტურით, განათლებით ბრძოლის“ ჩარჩოებს.

ასევე სრული აბსურდია განცხადება, თითქოს ქართველ თავადაზნაურობას „ძველი დროის დაბრუნება მხოლოდ იმიტომ სურდა, რომ აღედგინა ის გავლენა და პრივილეგიები, რაც საუკუნეების მანძილზე გააჩნდა“ (გვ. 102). დისერტანტს მივმართავთ: არა, 1900-იანი წლების ჩვენებური თავადაზნაურობა ისეთი ბრიყვიც არ უნდა გვეგონოს, თითქოს მას უნდოდა ერეგლე

მეორისდროინდელი პატივი, სათავადოებისა და ბატონყმობის დაბრუნება. მა-შინდელი თავადაზნაურობა ბევრად უფრო რეალისტური იყო, ვიღრე წინამდებარე დისერტაციის აღნიშნული წინადადგება გულისხმობს (გვ. 102).

დაბოლოს, პარაგრაფის ბოლო გვერდზე ავტორს ახსენდება, რომ და-მოუკიდებელი საქართველოსდროინდელ თავადაზნაურობაზეც უნდა ითქვას ორიოდე სიტყვა მაინც და ერთადერთი ამონაწერით გაზ. „ერთობიდან“ ამ ხანასაც ეხდება ხარკი. პარაგრაფის ბოლოს კიდევ ერთხელაა გამეორებული თეზის, რომ განსახილველ პერიოდში თავადაზნაურობა აღარ წარმოადგენდა ძველებური სიძლიერის მქონე წოდებას და რომ „წარმოდგენილმა მასალამ საინტერესო დასკვნების გამოტანის საშუალება მოგვცა“ (გვ. 103).

ჩვენც გავაკეთოთ დასკვნა: ავტორმა უნგბურად მართალი თქვა, რომ პარაგრაფს „წარმოდგენილი მასალის“ სტატუსი მიანიჭა. მართლაც, აქაა მხოლოდ ამონარიდები, ამონაწერები, ციტირებები, რომელნიც „მასალებია“. წინამდებარე პარაგრაფშიც და წინა პარაგრაფებშიც მხოლოდ ეს ამონაწერებია ღირებული, რომლებიც დისერტაციის დანიშნულებას არ პასუხობს, მაგ-რამ სხვადასხვა თემისათვის „მასალის“ მნიშვნელობა შეუძლიათ გასწიონ.

რაც შეეხება პარაგრაფს, მისი შინაარსი საერთოდ არ პასუხობს დი-სერტაციის მთავარ მიზნებს: მასში არაა ნაჩვენები ქართველი თავადაზნაურობის წარმომადგენელთა შეხედულებები, პოზიციები, მსოფლმხედველობა, მათი ეროვნული იდენტობა, ეროვნული ღირებულებები და ა.შ. ამონაწერები ეხება პოლიტიკური პარტიების ორგანოების მიერ გამოთქმულ პოზიციებს, შეხედუ-ლებებს. პარაგრაფში საერთოდ არ ჩანს ქართველი თავადაზნაურობის დამო-კიდებულება მიმდინარე პროცესებისადმი, ეროვნული მოძრაობისადმი, სახელ-მწიფოებრიობისადმი, ეროვნული მახასიათებლებისადმი და ა.შ. ტექსტი შეი-ცავს მრავალრიცხოვან ფაქტობრივ და აზრობრივ შეცდომას და დებულებას.

„§6. ბურჟუაზია“. რადგან გადავწყვიტეთ, რომ ჩვენს კრიტიკულ გა-მოხმაურებას გარკვეულწილად მეთოდოლოგიური დანიშნულებაც მივანიჭოთ, დეტალურად განვიხილოთ წინამდებარე პარაგრაფიც. პასუხი გავცეთ კითხ-ვას: რა უნდა იყოს განხილული და რის შესახებაა საუბარი მასში. დისერ-ტაციის სახელწოდებიდან და შესავლიდან გამომდინარე, ნაშრომში, კერძოდ კი ამ პარაგრაფში, შესწავლილი უნდა იყოს: როგორი დამოკიდებულება პქო-ნდა ბურჟუაზიას ეროვნული ღირებულებების, იდენტობრივი მახასიათებლების მიმართ (ენა, სამშობლო, ტერიტორია, ქრისტიანობა, ტრადიციები, ავტონო-მია, დამოუკიდებლობა...) ამ თემებს უნდა დასტრიალებდეს ბეჭდურ მედიაში

მოძიებული მასალა. სხვა ყველაფერი, რაც ამ ოქმატიკას არ ეხება, დისერტაციას არ მიეკუთვნება. ის ცრუმასალაა, რომელიც სპეციალურად აქსებს ცარიელ ფურცლებს. ახლა ვნახოთ, რის შესახებაა საუბარი წინამდებარე პარაგრაფში.

მსჯელობა იწყება ბატონყმობის გაუქმებით. ეროვნული სახელმწიფო-ბის ჩამოყალიბებით და, როგორც ჩანს, ევროპაში კაპიტალიზმის დამკიდებით XIX საუკუნის მეორე ნახევარში. ამჯერად საქართველოში, რომელსაც „უპრობლემო“ არ ჩაუვლია. აქ გვხვდება გვარიანად ბუნდოვანი წინადაღება, რომელიც არაფრით არ უკავშირდება კონტექსტს. უნდა მოლიანად მოვიყვანოთ, რათა მეოთხველმაც გაიაროს ის ინტელექტუალური ტანჯვის გზა, რაც ჩვენ გავიარეთ და რაც წინ გველოდება.

„გარდა იმისა, რომ XIX საუკუნის დასაწყისს საქართველო რუსეთის იმპერიის დამპყრობლური პოლიტიკის შედეგად მის დაქვემდებარებაში შესვლით შეხვდა და ჯერ კიდევ ვერ გამოსულიყო ქართველობა საიმპერატორო კარის რუსიფიკატორული ქმედებების უკიდურესი ფორმების გააზრებიდან, რაც ეროვნული სიმბოლოების: საკუთარი ტერიტორიის, ქართული ენის, ქრისტიანობის დაკარგვა-გაუქმებაში გამოიხატებოდა, რომ XIX საუკუნის მეორე ნახევრიდან შეცვლას იწყებს ფეოდალურ სისტემაზე აგებული მოდელი და საქართველო ახალი გამოწვევების წინაშე დგება“ (გვ. 104). წინადაღებიდან ვიგებთ, რომ „ქრისტიანობის დაკარგვა-გაუქმებასთან“ ერთად ნაშრომში ბატონყმობის გაუქმება და ფეოდალიზმის გადაშენება უარყოფით მოვლებადაა აღქმული, მაგრამ ამის შესახებ ქვემოთ, სადაც კაპიტალიზმის ათვალწუნება უფრო მკვეთრადაა დაფიქსირებული.

პირველი ამონაწერები (გვ. 105-106) ფედერალისტური „საქართველო-დან“, ფილიპე მახარაძის რედაქტორობით გამომავალი „მოგზაურიდან“, სოციალ-დემოკრატიული „კვალიდან“ და „ხალი კვალიდან“, ანარქისტული „მუშიდან“ ბურჟუაზიისა და პროლეტარიატის არც თუ ტკბილ ურთიერთობას ეხება. ჩვენ სპეციალურად ვუთიოებთ გაზეთების პარტიულ კუთვნილებას, რადგან დისერტაციაში ისინი ყოველთვის ანონიმურნი არიან და არც გამოყენებული ციტირებების ავტორები არსად სახელდებან, გარდა მცირე გამონაკლისისა. რატომ?

108-ე გვერდზე სოციალისტ-ფედერალისტები ჩნდებიან დისერტაციაში და ბურჟუაზიას უკავშირებენ ეროვნული თავისუფლების იდეას, რითაც მკრთალად მაინც ეხმაურებიან ეროვნულ თემატიკას, მაგრამ ეს ფრაგმენტია.

შემდეგი ამონაწერების უმრავლესობაც ბურჯუაზის როლისა და ადგილის შესახებ სოციალ-დემოკრატიულ პოზიციას აფიქსირებს, რომელთა მიხედვითაც ამ კლასს სურს „საკუთარი სახელმწიფო“ თავისივე ინტერესების გამო, რათა მოიპოვოს ბაზარი ან დაუპირისპირდეს უცხოურ ბურჯუაზის. ეს ხომ ცნობილი მარქსისტული მიღომებია.

აღნიშნული მარქსისტული პოზიციებიდან გამონაკლისია ციტირება ეროვნულ-დემოკრატიული მიმართულების ჟურნალ „კლდიდან“ (გვ. 111) და „სახალხო საქმიდან“, რომლებშიც ქართული ბურჯუაზის ეროვნულ ინტერესებზეა საუბარი. აღარ გავიმეორებთ ტრადიციულ ბრალდებას, რომ პარაგრაფში სხვა ოპონენტური პოლიტიკური ჯგუფების, უმთავრესად სოციალ-დემოკრატებისა და ნაწილობრივ სოციალისტ-ფედერალისტების პოზიციებია ამონაწერილი ბურჯუაზის შესახებ, გარდა რამდენიმე გამონაკლისა 111-112-ე გვერდებზე. რაც მთავარია, ჩვენთვის უცნობი დარჩა მთავარი საკითხი: ვინ იყვნენ ქართული ბურჯუაზის წარმომადგენლები, რას ფიქრობდნენ ისინი ეროვნული ლიტერატურულების შესახებ და რა პოზიციები გააჩნდათ მის მიმართ; რა დამოკიდებულება ჰქონდათ მათ მიმდინარე ეროვნული მოძრაობისადმი, როგორ უყურებდნენ ისინი ისტორიულ წარსულს, ტრადიციებს, რელიგიას, ეკონომიკას, უცხო ბურჯუაზისა და ა.შ. იმ ერთი ამონაწერით კი არ უნდა დაკმაყოფილებულიყო დისერტანტი ჟურნალ „კლდიდან“, არამედ მას სწორედ ეს ჟურნალი და გაზეთი „საქართველო“ უნდა შეესწავლა და იქიდან ამონეკრიფა ქართული ბურჯუაზის მსოფლმხედველობრივი ავლა-დიდება. ერთი სიტყვით, დისერტანტმა ამ პარაგრაფშიც საკმაოდ გამრჯედ იმუშავა, ამონაწერი რა მრავლად ციტატები, მაგრამ არა საკუთარ, არამედ სხვის ყნაში. ამონაწერები სხვა თემატიკას ეკუთვნის და მას აქაც საკუთარი დისერტაციისათვის არაფერი შეუმატება.

რაც შეეხება პირველი რესპუბლიკის ხანას, მას ნაშრომში უმცირესი ადგილი, ერთი-ორი ციტატა ეძღვნება ხოლმე. ამ პარაგრაფში კი მას 11 ციტირებიდან ერთიც არ ერგო, თითქოს ქართულ ბურჯუაზისა დამოკიდებელ საქართველოში არსებობა შეეწყვიტოს. სამაგიეროდ. პარაგრაფი მთავრდება საბჭოთა ისტორიკოს ე. ახობაძის 1965 წელს გამოცემული წიგნიდან ციტატით და ამით ასრულებს დისერტანტი გადამწერლობას აღნიშნულ პარაგრაფში.

III თავის უკანასკნელი – მეშვიდე პარაგრაფი „ინტელიგენციას“ ეძღვნება და 4 ფურცელს მოიცავს. თავდაპირველად ა. ჯორჯაძის, ნ. ჟორდანიასა და ა. სურგულაძის შეფასებებით ფასდება ინტელიგენციის ფუნქციები და და-

ნიშნულება. განსახილველი პერიოდის სხვადასხვა პოლიტიკური ჯგუფი ინტელიგენციის განხვავებულ შეფასებებს იძლევა. 1912 წლის „ბათუმის გაზეთი“ გმობს „ხალხისაგან მოწყვეტილ“ ინტელიგენციას; 1911 წლის „მნათობი“ მას არ ჩამორჩება; გაზეთი „ივერია“ სკეპტიკურადაა განწყობილი საკუთარი ქვეყნის ინტელიგენციის მიმართ; უარყოფითი პოზიციისაა აგრეთვე 1919 წლის „ახალი საქართველო“, მაგრამ იგივე გაზეთი და იგივე სტატია ცოტა ქვემოთ ახლა ქვებას ასხამს ინტელიგენციის ეროვნულ თავდადებას. ასევა თუ ისე უარყოფითი პათოსის შემცველი ამონაწერები უფრო მეტია და რა აზრისაა თვით ავტორი ინტელიგენციის შესახებ, ძნელი სათქმელია. ამ ამონაწერებით საპირისპირო აზრებს ოპონენტური ჯგუფები და გაზეთები გამოოქამნა. სულ ეს არის. სხვების აზრის გადმოცემა-შეფასებას ემსახურება პარაგრაფში მოყვანილი 13 ციტატაც. რაც შეეხება თვით ინტელიგენციის წარმომადგენლების ეროვნულ შეხედულებებს, მათ დამოკიდებულებას ეროვნული სიმბოლოებისადმი, მასასიათებლებისადმი და ა.შ. პარაგრაფში ამის შესახებ არაფერია არც ამოწერილი და არც გაანალიზებული. მივიღეთ პარაგრაფი ინტელიგენციის შესახებ ფაქტებით, რომლებიც ისედაც კარგადაა ცნობილი.

ავტორი განმარტავს, რომ „თანამედროვე თეორიულ ლიტერატურაში გამოიყენება ტერმინი კულტურული და პოლიტიკური ელიტა“. სავსებით შესაძლებელია, დავეთანხმებით ჩვენც, მაგრამ ეს არ ნიშნავს ამ ორი ჯგუფის იგივეობას. 1900-იან წლებში ინტელიგენცია აღნიშნავდა საზოგადოების კულტურულ-ინტელექტუალურ ნაწილს, ხოლო მისგან მკვეთრად იყო გამიჯნული პოლიტიკური ელიტა. დისერტაციაში ეს ორი ჯგუფი ხშირად ერთად და ერთი მნიშვნელობით მოიხსენიება, რაც მაშინდელ რეალობას არ შეესაბამება. ნ. უორდანია, გ. ლასხიშვილი, ს. კედია თუ გ. გოგელია ან ა. ჩხერიშვილი პოლიტიკური ელიტის წარმომადგენლები იყვნენ და არა ინტელიგენციას. თუ ჩვენ გვინდა მეცნიერულ სისტემაში მოვაჭიოთ მოვლენები, მაშინ მოღვაწეთა აღნიშნული ჯგუფებიც უნდა გავმიჯნოთ, ხოლო თუ მათ შევაერთებოთ, მაშინ ვაჟა-ფშაველაც და ფილიპე მახარაძეც ინტელიგენციის წარმომადგენლებად მოგვევლინებიან.

არც პოლიტიკური ელიტა იყო მაშინ ჩვენში ერთიანი კატეგორია. ეს მაშინდელი საქართველოს პოლიტიკური რეალობის სამწუხარო თავისებურება გახლდათ. პოლიტიკური ელიტა ორ დაპირისპირებულ ბანაკად იყო გაყოფილი – რევოლუციურ და ეროვნულ ჯგუფებად. ეს თავისებურება, შესაძლოა,

იდენტობის დასაგლელმა თეორეტიკოსებმა არ უწყოდნენ, მაგრამ „ეპოქის“ საციალისტებმა კი უნდა იცოდნენ. ამიტომ არ არის სწორი, როცა ავტორი გვიწერს: „XX საუკუნის 10-იანი წლებიდან პირველი მსოფლიო ომის წინა და მიმდინარე პერიოდში განსაკუთრებით გააქტიურდა პოლიტიკური ელიტა, რომელიც საქართველოს გათავისუფლების სახელით გამოდის. საერთოდ, კულტურული და პოლიტიკური ელიტის მიზანი ერთი იყო: ქართველი ერის ეროვნული ცნობიერების ამაღლება და დამოუკიდებლობის აღდგენა. თუმცა ამ მიზნამდე ირანი სხვადასხვა გზებით მიღოდნენ“ (გვ. 117).

დისერტაციაში სხვა რომელიმე ქვეყანაზე ხომ არ არის საუბარი?! მაგ., პოლონეთზე, სადაც სოციალ-დემოკრატებიც და სოციალისტური პარტიაც, მიუხედავად დაპირისპირებისა, პოლონეთის ავტონომიას მოითხოვდნენ? არა, როცა საქართველოში, ეროვნულმა კომიტეტმა დამოუკიდებლობის ლოზუნგი წამოაყენა, ხოლო საქართველოში ფედერალისტები ავტონომიისათვის იბრძოდნენ, სოციალ-დემოკრატები ორივე მოთხოვნის წინააღმდეგ გამოდიოდნენ. ასე რომ, დისერტანტს უნდა დაეწერა, რომ საქართველოს თავისუფლებისათვის იბრძოდა ქართული პოლიტიკური ელიტის ნაწილი ან მნიშვნელოვანი ნაწილი.

ამის შემდეგ კვლავ ისტორიული ფაქტების უცოდინრობის მორიგი გამოვლინება. მაგ., დისერტაციაში ვკითხულობთ, რომ „ამ მხრივ აღსანიშნავია, ჯერ კიდევ 1907 წელს ვარლამ ჩერქეზიშვილის ჰააგის საერთაშორისო კონფერენციაზე გამოსვლა და საერთაშორისო საზოგადოებასთან მიმართვა...“ (გვ. 117). არა, ჩერქეზიშვილი ჰააგის კონფერენციაზე არ გამოსულა. მის მიერ შედგენილი საქართველოს ხალხის პეტიცია ჰააგაში ჩაიტანა ინგლისელმა უურნალისტმა ნევნისონმა და ფოსტით გაუგზავნა კონფერენციას.

ამ პარაგრაფში ავტორმა ვერ წარმოაჩინა ქართველი ინტელიგენციის დამოკიდებულება ეროვნულ სიმბოლოებთან, მისი ეროვნული ღირებულებები და, ფაქტობრივად, გაიმეორა ის, რაც კარგად იყო ცნობილი. საერთოდ, პარაგრაფში მოყვანილ 13 ციტატაში საუბარია არა ინტელიგენციის ეროვნულ ღირებულებებზე, მის დამოკიდებულებაზე იდენტობრივი მახასიათებლების მიმართ, არამედ თვით ინტელიგენციის შესახებ სხვა პოლიტიკური და საზოგადოებრივი ჯგუფების წარმომადგენლების მოსაზრებებსა და პოზიციაზე. ამ მიზეზის გამო ნაშრომის ეს ნაწილიც ვერ ჩაითვლება დისერტაციის შემადგენელ ნაწილად.

ამგვარი ვითარებითა და მდგომარეობით გადავდივართ დისერტაციის

მეოთხე თავზე, რომლის სათაურიცაა: „ნაციონალური ნარატივის ფორმირება და ნაციონალური სიმბოლოები (1900-1917). ამ თავის ორ პარაგრაფს ერთად განვიხილავთ: §1. ისტორიული მექსიკურება და ტრადიცია“ და „§2. მუზეუმი და თეატრი“. დისერტაციის ამ ნაწილიდან ე.წ. კვლევისა თუ გადმოცემის პროცესი კიდევ უფრო მარტივდება. პარაგრაფებში ბლომადაა ამონაწერები, რომელებიც საუბარია ქართველი ხალხის ისტორიულ წარსულზე; დასახელებულ-მოგონებულნი არიან ქართველი მეფეები, თავდადებული მოღვაწენი, მწერლები, წმინდანები; ან საუბარია ისტორიული მახსოვრობის მნიშვნელობაზე, ერთიანობაზე. პირველ პარაგრაფში 26-27 ასეთი ამონაწერია მოყვანილი და არსებითად ამით მთავრდება კიდეც გადმოცემის კვლევითი ნაწილი. ავტორის კომენტარები ან ციტატების შინაარსს იმეორებს, ან სხვა თემატიკას ეხება, ან რომელიმე თეზისს იმეორებს, რაც ადრე არაერთხელ აქვთ ნათქვამი და რაც ისედაც კარგადაა ცნობილი. სულ ეს არის.

პარაგრაფის დასაწყისიდან ვიგებთ, რომ 1900-1917 წლების პერიოდში ბეჭდვით მედიაში თურმე „მთავარი აქცენტი კეთდება ისეთ იდენტობრივი მახასიათებლებზე, როგორებიც ისტორიული მახსოვრობა, ტრადიცია, თეატრი, მუზეუმი“ (122). არის თუ არა თანაზომადი ცნებები, მით უმეტეს კი „იდენტობრივი მახასიათებლები“ ისტორიული მახსოვრობა, ტრადიცია, თეატრი და მუზეუმი. პირველი ორისაგან განსხვავდით, უკანასკნელი ორი ხომ დაწესებულებებია, ორგანიზაციებია. თეატრში შეიძლება სრულიად ანტინაციონალური სპექტაკლები დაიდგას და რანაირად იქნება ის „იდენტობრივი მახასიათებელი“. თეატრის ხასიათი მის რეპერტუარზეა დამოკიდებული. მაგალითად, „სირანო დე ბერჟერაკი“ ვერაფრით ვერ მოემსახურება იდენტობრივი ცნობიერების შექმნა-ამაღლებას, ისევე როგორც ველოსიპედების მუზეუმი. რაც შეეხება ეროვნული მიმართულების თეატრებს, მუზეუმებს – ისინი იდენტობრივი მახასიათებლების პროპაგანდის საშუალებებს წარმოადგენენ და არა თვით მახასიათებლებს. იგივე შეიძლება ითქვას ბეჭდვითი მედიის შესახებაც. XX საუკუნის პირველი ოცწლეულის ქართულ ბეჭდვით მედიას ჰქონდა ერთი დამახასიათებელი თავისებურება. მაშინდელი ქართული პრესის ორგანოების ნახევარზე მეტი, მენშევიკური და ბოლშევიკური უკრნალ-გაზეთები, წლების განმავლობაში კი არ ამყარებდა ქართულ იდენტობას, არამედ პირიქით, ერძოდა, უგულვებელყოფდა, აკრიტიკებდა და ძირს უთხრიდა იდენტობრივ მახასიათებლებს, ხელს უშლიდა ეროვნული კონსოლიდაციის პროცესს.

ზოგიერთი კომენტარიდან ჩანს, რომ დისერტანტმა იცის ქართველი

სოციალ-დემოკრატების ანტინაციონალისტური პოზიციის შესახებ. მაგრამ პრობლემა ხშირად ისაა, რომ იგი ვერ ახერხებს რეალობის ზუსტი, აღეკვა-ტური ფორმულირებით გამოხატვას. როდესაც დისერტაციაში ვკითხულობთ, რომ ქართული ბეჭდვითი მედია „საერთო ნაციონალური იდეების პროპაგან-დას ეწეოდა...“ (გვ. 129, 126, 130, 131, 135...). სამწუხაროდ, ასე არ იყო. სწო-რი ფორმულირებაა – მედიის ნაწილი, ეროვნული მიმართულების მედია და ა.შ.

მეორე სიყალბე, დამახინჯება, ან უფრო სწორი იქნებოდა გვეთქვა, ჩვენი ისტორიის გაპრიმიტიულება თვით წინამდებარე მეოთხე თავის სათა-ურშია და, აქედან გამომდინარე, მის შინაარსშიც, რადგან შინაარსი სათაურ-სა და დასმულ საკითხს პასუხობს. სათაური გვამცნობს: „ნაციონალური ნა-რატივის ფორმირება...“ რას გვეუბნება ეს სათაური? უპირველეს ყოვლისა იმას, რომ ნაციონალური ნარატივის ფორმირება ჩვენს კურთხეულ სამშობ-ლობი თურმე XX საუკუნის დასაწყისში მომხდარა. რადგან ასეთ პრეტენზი-ულ განცხადებასთან გვაქს საქმე, ჯერ კარგად უნდა გავიგოთ, რას გულის-ხმობს ავტორი „ნარატივში“. ამისათვის მის შინაარსს, უფრო სწორად, ამო-ნაწერებს უნდა მივყვეთ, რადგან, ჯერ ერთი, რომ ისინი შინაარსის უმეტე-სობას შეადგენენ და, მეორეც, სწორედ ისინი ქმნიან პარაგრაფის ნამდვილ შინაარსს, რადგან მათი ავტორისეული კომენტირება ან გამეორებაა, ან სხვა თემაზე გადახვევა. პარაგრაფი 19 გვერდს და 26 ციტატას მოიცავს. ციტა-ტები შემდეგ ოემებს ეხება: ისტორიულ წარსულს, მისი შესწავლის აუცი-ლებლობას, მითოლოგიზაციას, წინაპრებს, (გვ. 122, 127, 128, 129, 130, 131, 132, 133); სამშობლოს სიყვარულს, (გვ. 125, 126, 132, 134), ეროვნულ ერ-თიანობასა და ცნობიერებას (გვ. 124, 125, 135), ერის, ენის, ტრადიციების დაცვა-შენარჩუნებას (გვ. 122, 133, 134). ამ ამონაწერებს ერთი ღირსება წინა თავებთან შედარებით ნამდვილად აქვთ: დისერტაციის 122-ე გვერდიდან ციტატები დისერტაციის საერთო თემატიკას – ზოგად-ნაციონალურ საკითხებს – ეხება.

მიუხედავად ამისა, არც ამონაწერები და არც შინაარსი სრულიადაც არ ემსახურება „ნაციონალური ნარატივის ფორმირებას“. მეტიც, ისინი არც შეიძლება, რომ ქმნიდენ ნაციონალურ ნარატივს, რადგან 1900-1917 წლებში არც მომზდარა ნაციონალური ნარატივის „ფორმირება“. თვით საკითხის ამგ-ვარად დასმა ნონსენსია. ნაციონალური ნარატივი გულისხმობს ნაციონალური იდეის, ბირთვი-იდეების ჩამოყალიბებას, ცალკეული ნაციონალური იდეების კონცეპტუალიზაციას.

დისერტაციის ამ პარაგრაფის სათაურის აზრს ეწინააღმდეგება აგრეთვე

ქართული იდენტობის სფეროში არსებული უახლესი სამეცნიერო ლიტერატურაც. მაგ., მკლევარი მარიამ ჩხარტიშვილი წერს: „ქართული ეროვნული იდეის სრული ვერსიის ავტორია დიდი მწერალი და საზოგადო მოღვაწე ილია ჭავჭავაძე...“

შემდეგ: „ივერიამ“ ილია ჭავჭავაძის მეთაურობით თავისი მრავალწლიანი მოღვაწეობით ქართული ეროვნული კონცეფციის შექმნის ამოცანა გადაჭრა წარმატებით; მან პრაქტიკულად სრულად ასახა ქართველი ერის კონცეფტუალიზაციის შესახებ ქართული კულტურული კლიტის წრეში მეცხრამეტე საუკუნისა და მეოცე საუკუნის მიჯნაზე არსებული დისკურსი, რაც, ფაქტობრივად, ნიშნავდა ქართველი ერის იდეის გავრცელებას“.

დაბოლოს, იმავე ავტორის თქმით, „ივერიამ“ ქართველობა უზრუნველყო მრავალწახნაგოვანი და საოცრად დეტალური ეროვნული ნარატივით“ (მარიამ ჩხარტიშვილი. ქეთევან მანია. ქართველთა ნაციონალური კონსოლიდაციის პროცესის ასახვა ბეჭდურ მედიაში. „ივერია“ და მისი მკითხველი საქართველო. I. 2011. გვ. 539, 540). ეს ნიშნავს, რომ ნაციონალური ნარატივის შექმნა განხორციელებულა XIX საუკუნის მეორე ნახევარსა და „XX საუკუნის მიჯნაზე“. ეს „მიჯნა“ 1906 წლის აქეთ ვედარ გამოგრძელდება, რადგან გაზეთ „ივერიის“ გამოცემა ამ წლის 27 აგვისტოს შეწყდა. ასე რომ, „ნაციონალური ნარატივის ფორმირება“, რის დაწერასაც წინამდებარე დისერტაციის ავტორი იჩემდეს, უკვე შექმნილი იყო და ის არარსებულის შესახებ წერს.

გარდა ამისა, ისიც დასაზუსტებელია, ჩვენ მიერ დამოწმებული ავტორები კონკრეტულად რომელ წელს გულისხმობენ „XX საუკუნის მიჯნად“, სადამდეც გრძელდებოდა ნაციონალური ნარატივის ჩამოყალიბება. ალბათ, ისინი გულისხმობენ არა 1906 წელს, სანამ „ივერია“ გამოდიოდა, არამედ 1901-1902 წლებს, როცა ნაციონალური ნარატივის მთავარმა შემოქმედმა, ილია ჭავჭავაძემ, ავადმაყოფილისა და გადაღლის გამო თავი დაანება „ივერიის“ რედაქტორობას, გამომცემლობასა და მასში წერილების ბეჭდვას (ი. გორგაძე. 6. გურგენიძე. ილია ჭავჭავაძე – ცხოვრებისა და შემოქმედების მატიანე. თბ., 1987. გვ. 311-322).

ერთი სიტყვით, ნაციონალური ნარატივი, ნაციონალური ბირთვი-იდეები, რომელთა კონსტრუირება ილია ჭავჭავაძის მთავარი დამსახურებაა, XIX საუკუნის მეორე ნახევარს ეკუთვნის. ამდენად, „ნაციონალური ნარატივის ფორმირების“ პერიოდად მისი გადმოტანა და გადმომსამართება 1900-1910-იან წლებში სხვა არაფერია, თუ არა ქართული საზოგადოებრივ-პოლიტიკური

ცხოვრების ხარისხის გაპრიმიტიულების განზრას თუ უნებლიერ გამოვლინება. სხვა ამბავია, რომ ამ პერიოდში გრძელდებოდა დისკურსი ნაციონალური ნარატივის შემდგომი სრულყოფის შესახებ. ეს კი სულ სხვა თემაა. მასში იგულისხმება პოლიტიკური პარტიების შექმნა, მათი ეროვნული იდეოლოგიების ჩამოყალიბება, პროგრამების კონსტრუირება, რაც ჩვენს ისტორიოგრაფიაში საკმაოდაა შესწავლილი და მას დისერტაციის ავტორი საერთოდ არ ეხება.

ჩვენი ავტორი თთქოს ცდილობს, ისტორიული მოვლენები „გაახალგაზრდას“, ზოგიერთი მათგანის წარმოქმნის პროცესი XX საუკუნის დასაწყისში გადმოიტანოს. დისერტაციაში ვკითხულობთ, რომ თურმე „XX საუკუნის 10-იანი წლების საქართველოში ისტორიული წარსულის, ტრადიციების, წეს-ჩვეულებების პროპაგანდასთან ერთად აქტუალური ხდება ე.წ. ნაციონალური სიმბოლოები, ნაციონალური იდეალები, რომელიც პირველად მე-17 საუკუნის ბოლოსა და მე-18 საუკუნის დასაწყისში გაჩნდა დასავლეთ ევროპაში“. კარგა გვარიანად ჩამორჩენილები ვყოფილვართ – სად XVII საუკუნე და სად XX საუკუნის 10-იანი წლები. მაგრამ ეტყობა, ჩვენც გვეშველა და, აი, ჩვენი დისერტანტის თქმით, ევროპაში „განათლებამიღებულმა ქართული კულტურული და პოლიტიკური ელიტის წარმომადგენლებმა“ ნაციონალური სიმბოლოების ამბავიც შეიტყვეს და „XX საუკუნის 10-იანი წლებიდან ბეჭდური მედიის საშუალებით აქტიური აგიტაცია დაიწყეს“. „ეროვნული თვითშეგნების განტკიცება ნაციონალური სიმბოლოების მეშვეობითაც“ (გვ. 135). ამ შემთხვევაში ნაციონალურ სიმბოლოებში იგულისხმება იუბილეები, ძეგლები და სხვადასხვა ნაციონალური ცერემონიალი, რომელიც ავტორის რწმენით და მტკიცებით, საქართველოში 1910-იანი წლებიდან შემოდის. ცხადია, ამ აღმოჩენას ავტორი პრესიდან ციტირების მოტანით „ასაბუთებს“, თუმცა იქ არავის უწერია, რომ ეს პროცესი საქართველოში XX საუკუნის 10-იან წლებში დაიწყო.

რა დასახანაა, რომ ავტორმა თავისი დისერტაციის თემად XIX საუკუნის მეორე ნახევრის ქართული ბეჭდვითი მედია არ აიღო. ასე რომ მოქცეულიყო დისერტანტი, მაშინდელ პრესაში აუცილებლად ნახავდა, რომ იუბილეები საქართველოში XIX საუკუნის მეორე ნახევრიდან იმართებოდა. 1876 წელს ქართველმა თერგდალეულებმა აღნიშნეს გაზეთ „დროების“ დაარსებიდან ათი წლისთავის იუბილე; 1895 წელს აღნიშნა რაფიელ ერისთავის ლიტერატურული მოღვაწეობის 50 წლის იუბილე; ახლა, როცა წინმდებარე გამოხმაურების ამ პასაჟს ვწერ, მასენდება, რომ იმავე 1895 წელს ქართ-

ველმა საზოგადოებამ პატივი მიაგო კრწანისის ომის 100 წლისთავს და ა.შ. რაც შეეხება ძეგლებს, ეროვნული მოღვაწეების ძეგლების დადგმას რუსული ხელისუფლება უშლიდა ხელს, რის გამოც ჩაიშალა ნიკოლოზ ბარათაშვილისა და სხვა მოღვაწეებისათვის ძეგლების აღმართვის პროცესი, თორემ, როგორც დისერტაცის უყვარს გამოთქმა, „რუსეთის საიმპერატორო კარს“ ხელი არ შეუშლია თბილისში მეფისნაცვალ მიხეილ ვორონცოვის ძეგლის აღმართვისათვის. აი, ასე გახდა ნაციონალური სიმბოლოები: ოუბილები და ძეგლები აქტუალური „XX საუკუნის 10-იანი“ წლებიდან.

დაბოლოს: ისიც დისერტაციის უცნაური ფანტაზიაა, თითქოს „პოლიტიკური ცენზურა“ ხელს უშლიდა ქართველ ინტელიგენციას, ბეჭდური მედიის საშუალებით „ისტორიული წარსულის, ტრადიციების და ზოგადად, საქართველოს ისტორიის პროპაგანდით ყველა ქართველი თანამედროვე ეპოქაშიც კონსლიდაციისაკენ მოწოდებინა“ (გვ. 131). მართლაც ასე რომ ყოფილიყო, მაშინ ჩვენი დისერტაციი დისერტაციის გარეშე დარჩებოდა და ასეულობით ციტირებას ვეღარ გააკეთებდა თავის წინამდებარე დისერტაციაში. პირიქით იყო: ოღონდ ქართველებს საკუთარი სახელმწიფო არ მოეთხოვათ; ოღონდ მათ ხელში იარაღი არ აეღოთ დამოუკიდებლობის მოსაპოვებლად; ოღონდ მათ ავტონომიაზეც კი ხმა არ ამოეღოთ და ამისთანა მკრეხელობები თავიდან ამოეგდოთ, მეფის ცენზურა ურიგდებოდა, ქართველებს რამდენიც უნდოდათ, იმდენი ეწერათ დავით აღმაშენებელზე და ცოტნე დადიანზე, დიდგორსა და კრწანისზე, მერჩულესა და რუსთაველზე, წინაპრებსა და ტრადიციებზე.

„თავი V. ქართული გარემო და ეროვნული იდენტობა“ – არ ვიცით, რა დანიშნულება აქვს ან რა სიახლეს გვპირდება ამ თავის შინაარსი, მაგრამ მისი სათაური კანონიერ კითხვას ბადებს: ადრინდელი თავები „ქართულ გარემოს“ ან „ეროვნულ იდენტობას“ არ ეხებოდა? ყოველ შემოხვევაში გვინდა გავიძიეოთ წინა თავში ჩვენ მიერ დაფიქსირებული რეალობა – 122-ე გვერდიდან, მართალია, ცალკეული თავები, პარაგრაფები სათაურებს ვერ პასუხობს, მაგრამ დისერტაციის თომატიკას მეტ-ნაკლებად ეხება.

ამასთანავე, ძველი შეცდომები, არასწორი, არაადეკვატური, რეალობას მოკლებული ფორმულირებები, განცხადებები, დებულებები თითქმის ყოველ გვერდზე გვხვდება, ისინი ერთი და იმავე სახით დაუსრულებლად მეორდება, მაგ., „ქართული კულტურული და პოლიტიკური ელიტა ბეჭდური მედიის საშუალებით ნაციონალური იდეების აქტიურ პროპაგანდას ეწეოდა“ და ა.შ.

V თავის მიზანი, ავტორის დაპირების მიხედვით, არის ერის იმ მახასიათებლების „ერთიან კონტექსტში“ განხილვა, რომლებიც გაზეთმა „ივერიაში“ ჩამოაყალიბა 1901 წლის ერთ-ერთ ნომერში. ავტორი, როგორც აბსოლუტური უმრავლესობის შემთხვევაში, აქაც არ ასახელებს სტატიის ავტორს. „ივერია“ აღნიშნულ წერილში ჩამოთვლის ერის ოთხ მახასიათებელს. თავში განხილულია ხუთი პარაგრაფი-საკითხი: „სამშობლო“; „ქართული ენა და განათლება“; „სარწმუნოება“; „ქალის, დედის საკითხი“; „ეკონომიკა“.

„§1. სამშობლო“, ანუ იგივე ტერიტორია, მოიცავს სამ ფურცელს. მასში 9 ვრცელი ციტირებაა მოყვანილი.

პელევის ან წერის მეოთე, რომელიც ნაშრომშია გამოყენებული, მარტივია: ავტორი ეძებს, ადგილად პოვებს და მოჰყავს მაშინდელი მრავალრიცხოვანი და მრავალოებაზური გაზეთებიდან ამონაწერები, პასაუები, ციტირებები, რომელიც ქვეყნის ტერიტორიის საკითხს რამენაირი კუთხით მაინც ეხმაურება. ადგილადო, იმიტომ ვამბობთ, რომ 1900-იანი წლების ქართული პრესა სავსეა ეროვნული პრობლემატიკის სხვადასხვა ასპექტის განხილვით. ამ მასალებიდან ციტატების მოტანა ადვილი საქმეა, მნელია მათი სისტემატიზაცია, ინტერპრეტაცია, ანალიზი, თემატიკის მიხედვით დალაგება, ტენდენციების გამოვლენა და დასკვნითი მსჯელობა. ეს ამონაწერები თავისთვად საინტერესოა, როგორც მასალები, მაგრამ გადაწერა უფრო, ვიდრე რამის დასაბუთება. ამ პარაგრაფშიც მხოლოდ ის ჩანს, რომ თურმე 1900-იანი წლების პრესაში სამშობლო-ტერიტორიის ერისათვის აუცილებლობაზე, როგორც მისი არსებობის ერთ-ერთ მახასიათებელზე, წერდნენ, მსჯელობდნენ. სულ ეს არის პირველი და უკანასკნელი ღირსება ამ პარაგრაფისა.

ციტატებით გადავსებულ ამ ნაშრომს და, კერძოდ, ამ პარაგრაფსაც უფრო მასალები უნდა ეწოდოს. პარაგრაფიც, შესაბამისად, ასეთ სათაურს მიიღებდა: „მასალები 1900-იანი წლების ბეჭდურ მედიაში სამშობლო-ტერიტორიის, როგორც ერის ერთ-ერთი მახასიათებლის შესახებ“. თავისთვად ეს არ გამორიცხავს, რომ ამ ამონაწერების გაკეთებით ავტორმა სასარგებლო საქმე გააკეთა: მან მოამზადა მასალები. ამგვარი მიდგომით განისაზღვრება დისერტაციის უანრიც, თუ ასეთ უანრს ითვალისწინებს სადისერტაციო წესდება. წინამდებარე ნაშრომი არის მასალების შეგროვების დონეზე შესრულებული პროდუქცია. ამ მხრივ შესრულებულია შრომატევადი სამუშაო.

იქნებ ვაჭარბებთ? რას ეხება პარაგრაფის ის ცირე ნაწილი, რომელიც ციტირებებს შორისაა გაფანტული. შევამოწმოთ. აი, მაგ., 147-ე გვერდზე

ამონაწერი ეხება თემას, რომ უტერიტორიოდ ერი იღუპება. ამის შემდეგ ავტორი აანალიზებს ციტირების არსებობას: ნაციონალური იდეა სხვადასხვა ეპოქაში ცვლილებას განიცდიდა; წინ წამოიწევდა ხოლმე ნაციონალური სიმბოლო, რომლის შენარჩუნებასაც სასიცოცხლო მნიშვნელობა ჰქონდა; 1900-1921 წლებში საზოგადოების აღქმა „ეტაპობრივ ცვლილებას განიცდის, 1900-1917 წლების იდეოლოგია ერთგვარი წინაპირობაა დემოკრატიული რესპუბლიკის პერიოდში შექმნილი მოვლენებისა“ (გვ. 147). განვმარტავთ, რომ წინადაღება – „1900-1917 წლების იდეოლოგია“ – უაზრობაა, ნონსენსია. ასეთი იდეოლოგია ქართულ პოლიტიკურ რეალობაში არ არსებობდა, ამიტომ ვერც ასეთი არარსებული იდეოლოგია იქნებოდა ვერაფრის „წინაპირობა“. არსებობდა რამდენიმე იდეოლოგია: სოციალ-დემოკრატიული მენშევიკური, სოციალ-დემოკრატიული ბოლშევიკური, სოციალისტ-ფედერალისტური, ეროვნულ-დემოკრატიული, ესერული, ანარქისტული, ლიბერალური და ა.შ. ამ რეალობას ავტორი დროდადრო აცნობიერებს, აფიქსირებს ხოლმე, მაგრამ ასევე დროდადრო, არ ვიციო, ავიწყდება, თუ ვერ ახერხებს მაშინდელი მრავალფეროვანი რეალობა ზუსტ მეცნიერულ ფორმულირებებში მოაქციოს და ტექსტი შექმნას.

აქვეა მომდევნო და მორიგი მისტიფიკაციაც: „საზოგადოების წამყვანი ნაწილი ბრძოლის ახალ გზას ადგება, რასაც, საბოლოო ჯამში, დამოუკიდებლობის აღდგენა უნდა მოჰყოლოდა, რომლის მონაწილე უნდა ყოფილიყო ქართული ერთობის ყველა წევრი“ (გვ. 147). ავტორისეული აზროვნების ამგვარ ოვისუფალ ნავარდს რომ რაიმეთი უკავშირდებოდეს ზემოაღნიშნული ციტირება ან სხვა ადრინდელი თემები, კიდევ ჰო, მაგრამ ის ციტირებები ენას, ტერიტორიას, განათლებას ეხება და არაფრითაა დაკავშირებული უცებ ამოტივტივებული დამოუკიდებლობის საკითხთან. რომელია ეს ბრძოლის ახალი გზა? აქ, 147-148-ე ფურცლებზე, არც ამაზე ადრე და არც ამის შემდეგ ამ ოქმატიკაზე არსადაა საუბარი ან ციტირება.

არც მომდევნო „ანალიტიკური“ აზაცია დაკავშირებული პარაგრაფის თემატიკასთან ე.ი. სამშობლოსა და ტერიტორიის საკითხთან. ავტორი მართებულად აღნიშნავს, რომ 1900-იან წლებში „მკვიდრდება ეროვნული პრობლემის კვლევის თეორიული მიდგომა“ მართალია, მაგრამ რატომაა მისი „მოავრი ფუძემდებელი“ მიხაკო წერეთელი? ავტორს რომ ეოქვა, მიხაკო წერეთელი საკითხის მეცნიერული შესწავლის ფუძემდებელიაო, აი, ეს იქნებოდა სწორი ფორმულირება და სხვისგან მაინც უნდა გაეზიარებინა, მაინც, მაგ.,

ედუარდ კოლუასგან. მიხაკო წერეთლის აწ უკვე განთქმული „ერისა და კაცობრიობის“ ხელახალი გამომცემელი და კომენტატორი ე. კოლუა ასე გვიწერს: „ეს იყო მიხაკო წერეთლის პირველი დიდი სოციოლოგიური შრომა და არსებითად პირველი სოციოლოგიური მონოგრაფია საქართველოში“ (მიხაკო წერეთელი. ერი და კაცობრიობა (სოციოლოგიური ანალიზი). რედ. ე. კოლუა. ობ., 1990 წლის გამოცემა. გვ. 4).

ავტორის შეცდომა კვლავ არასწორ ფორმულირებაშია: მ. წერეთელი ეროვნული პრობლემის მეცნიერული კვლევის პიონერია საქართველოში, მაშინ როდესაც არჩილ ჯორჯაძე „ეროვნული პრობლემის კვლევის თეორიული მიდგომის“ უპირველესი წარმომადგენელია საქართველოში. ჩვენს მეცნიერებზე აღრე ერთმა უნდაარმერის საქმეშ შეაფასა ა. ჯორჯაძის ადგილი და როლი, როცა მას „ქართველი ნაციონალიზმის იდეოლოგი“ უწოდა.

148-ე გვერდის დანარჩენ ნახევარზე ორი დიდი ციტატა და აქ ავტორი არაფერ შეუაშა, ისევე როგორც დისერტაციის თითქმის ნახევარი მოცულობის შემთხვევაში, რომელშიც ავტორი ციტატების ამოწერითაა დაკავებული და პატიოსანი შრომისმოყვარეობით ეწევა მასალების შეგროვება-გადმოცემას. მაგრამ ისევ 148-ე გვერდს დავუბრუნდეთ. აი, ორი ციტირება დასრულდა და შემდეგი ციტატის ამოწერამდე ავტორის ერთი განცხადებაა, რათქმა უნდა, არაზუსტი, არამეცნიერული, სრულიად არაადეკვატური. ავტორი წერს: „XIX საუკუნის II ნახევრიდან მოყოლებული მთელი ქართული პოლიტიკური და კულტურული ელიტის მიზანი მდგომარეობდა ილიას მიერ ჩამოყალიბებული ეროვნული პროგრამის განხორციელებაში...“ (გვ. 148). ამ ფრაზის უაზრობაზე უკვე ვისაუბრეთ და აღარ გავიმეორებთ, მაგრამ მხოლოდ იმას ვიტყვით, რომ ფრაზა: „კულტურული და პოლიტიკური ელიტა“, დისერტაციაში დაახლოებით იმდენჯერაა მოხსენიებული, რამდენი ფურცელიცაა მასში.

პარაგრაფის ბოლოს ავტორი დასკვნის სახით წერს, რომ სახელმწიფო უნივერსიტეტი დამოუკიდებლობა „ქართველი ერის მისწრაფება“ იყო, რასაც მის მიერ მოძიებული მასალები ადასტურებს. ესეც სიყალბეა: როგორც აღვნიშნეთ, პარაგრაფში 9 ციტირებაა. კველა მათგანი ეხება მხოლოდ სამშობლოს, ტერიტორიას, არც ერთ მათგანში არ არის საუბარი დამოუკიდებლობაზე. ეს გარემოება ამ შემთხვევაში სულაც არაა ავტორის ბრალი. უბრალოდ, 1917 წლამდე ქართულ პრესაში დამოუკიდებლობაზე თავისუფლი აზრის გამოთქმას მეფის ცენზურა სასტიკად კრძალავდა და ვერც დისერტაციი შეძლებდა მის შესახებ ბლომად ამონაწერების გაკეთებას ლეგალური პრესიდან. მის მი-

ერ ამოწერილი ციტატები კი სწორედ ლეგალური პრესიდანაა ამოკრეფილი: „ზეირთიდან“, „ივერიიდან“, „იმერეთიდან“, „ბათუმის გაზეთიდან“... ერთა-დერთ შემთხვევაში, ავტორს ციტირება მოჰყავს საზღვარგარეთ გამომაგალ გაზეთ „თავისუფალი საქართველოდან“, სადაც ბევრს წერდნენ სახელმწიფო-ებრივ დამოუკიდებლობაზე, მაგრამ ავტორის მიერ ამონაწერი ამ გაზეთიდან დამოუკიდებლობას საერთოდ არ ახსენებს. მოკლედ, ავტორის სიტყვები, და-მოუკიდებლობა ქართველი ერის მისწრაფება იყო და ამას ჩემ მიერ მოძიებული მასალები ადასტურებსო, მოკლეფეხებიანი ტყუილია.

„§2. ქართული ენა და განათლება“. ჩვენ, რა ოქმა უნდა, ამ და მოძევნო თავების დეტალურ გარჩევას ვეღარ გავაგრძელებთ. მკითხველიც უნდა დავინდოთ და დისერტანტსაც პატივი ვცეთ. იგი, როგორც ხშირად აღნიშნავს, „ურთულეს“ პერიოდს შეეჭიდა და უბრალოდ, ვერ დაძლია, მან ვერ შეძლო „ეპოქის“ თავისებურებების გაგება-გააზრება. წინამდებარე პარაგრაფ-შიც კვლევა არსებითად მაშინდელი პუბლიკაციებიდან მრავალრიცხოვანი ნაწყვეტების ამოწერით, ციტირებებით ამოიწურება. 151-180-ე გვერდებზე, ე. 29 გვერდზე 41 ამონაწერია გაკეთებული. ერთი სიახლეცაა: უკვე მთელი დოკუმენტებია გადმოწერილ-მოყვანილი. სულ პარაგრაფის შემადგენელი 960 სტრიქონიდან 560 სტრიქონი, ე. ი. ტექსტის ნახევარზე მეტს ამონარიდები და ციტირებები შეადგენს.

პარაგრაფის დასაწყისში ავტორი გვაფრთხილებს: ქართული ენა და საგანმანათლებლო სისტემა არაერთხელ გამხდარა მეცნიერთა შესწავლის სა-განი და „მათ შორის ბეჭდური მედიის საშუალებით“. ასეთ ვითარებაში დი-სერტანტის მიზანი ამ თავშიც ისაა, რაც ნაშრომის სხვა ნაწილებში: „ეპო-ქის მოთხოვნილებიდან გამომდინარე თითოეული ატრიბუტი ერთიან კონტექს-ტში“ განიხილოს. კი, მაგრამ, თუ ყველა ზემოაღნიშნული და ქვემოაღნიშნუ-ლი პრობლემები შესწავლილია, განა არა სჯობდა, რომ აღნიშნულ პრობლე-მათა შემსწავლელი სპეციალისტების დასკვნები და მოსახრებები დასდებლი ერთ-ერთ საფუძვლად დისერტაციას? მიუხედავად ამისა, ავტორმა შესწავლი-ლის ხელახლა შესწავლა გადაწყვიტა ვითომ, რაც სხვადასხვა თემატიკაზე ამონაწერების ციტირებებით ამოიწურა საბოლოოდ. „ერთიანი კონტექსტი“ კი სხვა არაფერია, თუ არა სხვადასხვა იდენტური მახასიათებლების შესახებ ამონაწერების თავმოყრა ერთ ნაშრომში.

უფრო კონკრეტულად და დისერტაბელურად გამოიყურება მომდევნო, მესამე პარაგრაფის, „სარწმუნოების“, მიზანი: „ცალკე საკითხია რა კუთხით

განიცდიდა ცვლილებას ქრისტიანული სარწმუნოების მიმართ ქართული საზოგადოების თოთოეული სოციალური ფენის თუ ჯგუფის ცნობიერება“ (გვ. 181). სულ სამი ფურცელია, შევამოწმოთ, რას წარმოადგენს მესამე პარაგრაფი. განხილულ ოქებს მივყვეთ: საუბარი იწყება ქრისტიანობის როლით ძველ საუკუნეებში; შემდეგ, რომ 1900-1917 წლებში „ქართველების მთავარი მოთხოვნა“ იყო ავტოკეფალის აღდგენა (კერძოდ, ვისი: ნოე უორდანიასი? ფილიპე მახარაძის? ისინიც „ქართველები“ იყვნენ – დ. შ.), შემდეგ: საქართველოს დაპყრობა, რუსითვიკაციის პოლიტიკა; ტექსტში სხვა აღარაფერია და ავტორი იწყებს ციტირებას. პირველი ციტირება ეძღვნება ქართული ეკლესიის დამსახურებას წინა საუკუნეებში, რომლის დავიწყებაც „არ არის სახეირ“ (გვ. 183).

მეორე ამონაწერიც ეკლესიის დვაწლს ეხება ძველ საუკუნეებში, მერე კი სოციალ-დემოკრატიული კრიტიკით მთავრდება (გვ. 183). მესამე ამონა-წერში სოციალ-დემოკრატი გრიგოლ ლორთქიფანიძე განმარტავს ქართული ეკლესიის რუსითვიკაციის პროცესს. სულ ეს არის. პარაგრაფი ცნობილ დებულებებს იმეორებს და ციტირებებით გამოხატავს სოციალ-დემოკრატიულ პოზიციას. ამდენად, ეს ოთხვერდიანი პარაგრაფი მინიმალურადაც არ პასუხობს ავტორის მიზანდასახულობას, გაემუქებინა სარწმუნოების მიმართ „საზოგადოების თოთოეული სოციალური ფენის თუ ჯგუფის ცნობიერება“. ასე რომ, ეს პარაგრაფიც მეცნიერულად არაფრისმოქმედია და არავითარ კვლევას არ წარმოადგენს.

„§4. ქალის, დედის საკითხი“. ამ სამფურცლიანი პარაგრაფის მოცულობის უმეტესობა ციტირებებს უკავია: 148 სტრიქონიდან ტექსტია 57 სტრიქონი, ხოლო ციტირებები – 91. ის მოლიანად პრობლემის მასალებს წარმოადგენს და არა კვლევას.

გადავიდეთ მეოთხე თავის უკანასკნელ პარაგრაფზე: „ეკონომიკა“. თავიდანვე შეიძლება ითქვას, რომ ამ პარაგრაფის შესახებაც ბევრის არაფრის თქმა მოხერხდება, ერთი მარტივი მიზეზის გამო – იგი თითქმის ციტირებებისაგან შედგება. პარაგრაფი მოიცავს უკვე ფურცელს, აქედან სამ ფურცელზე მეტი, ე. ი. უმეტესობა მოცულობისა, ციტირებებს უკავია, რომელთა რიცხვი ოცდაოთხია. ამონარიდები ეკონომიკურ თემატიკას ეხება, მაგრამ მათი უმრავლესობა ეკონომიკისადმი მაშინდელი ქართველი საზოგადოების დამოკიდებულების ძირითად ტენდენციებს ვერ ასახავს. ეკონომიკის განუვითარებლობის მთავარ მიზეზებად მიჩნეულია ხალხის გაუნათლებლობა, უცოდინრო-

ბა, ტექნიკის გამოუყენებლობა და სხვა მეორეხარისხოვანი მიზეზები. ასე სრულიადაც არ იყო. ცალმხრივი ციტატებია დამოწმებული. მაშინდელ პრესაში ბევრია ინფორმაცია და პუბლიკაცია, ქართულ ეკონომიკაში უცხოური, განსაკუთრებით კი, სომხური ბურუჟაზის პრიმატობის, მის წინააღმდევ ბრძოლის საჭიროებისა და სხვა მიზეზების შესახებ.

მაშინდელ პრესაში ბევრია სტატია, ცნობა, პოლემიკური მასალები სხვადასხვა პარტიისა თუ საზოგადო მოღვაწის დამოკიდებულების შესახებ ეკონომიკის თემატიკაზე, იმაზე, თუ როგორ განვითარებინათ და გაეძლიერებინათ ეროვნული ბურუჟაზია, შებრძოლებოდნენ სომხურ-უცხოური ბურუჟაზის პარტაშს ქალაქთა თვითმმართველობებში და ა.შ. მაგრამ ავტორი ამ საჭიროობო პრობლემების შესახებ დუშის და მხოლოდ ნაწილობრივ და ფრაგმენტულ ინფორმაციას იძლევა მაშინდელი რეალობის შესახებ. მას რომ დავუჯეროთ, ქართული ეკონომიკის განვითარებლობის მიზეზები ყოფილა გლეხობის უცოდინრობა, სწავლა-განათლების დეფიციტი, ჩამორჩენილი ტექნიკა და ქართველობის ფსიქოლოგიური შეუგუებლობა კაპიტალისტურ სისტემასთან. ეს ყველაფერი იყო, მაგრამ მხოლოდ ამ მომენტების აღნიშვნა რეალობის ცალმხრივი განმარტებაა. გარდა ამისა, პარაგრაფში არ ჩანს მოსახლეობის სხვადასხვა ფენის დამოკიდებულება და პოზიცია, ანუ „საზოგადოებრივი აღქმები“ ეკონომიკის განვითარების პრობლემებზე. პარაგრაფსა და ნაშრომის სხვა ნაწილებში ერთი სიტყვაც არ მოიძებნება, რომელიც დაადასტურებდა ან გამოავლენდა ქართული ბურუჟაზის თუნდაც ერთი წარმომადგენლის პოზიციას, აზრს ან შეხედულებას ეროვნული ეკონომიკის განვითარების პრობლემების შესახებ. ერთი სიტყვით, წინამდებარე პარაგრაფის მთავარი ნაკლი ისაა, რაც მოლიანად დისერტაციისა: მასში არაა შესწავლილი სოციალური ფენების, კერძოდ, გლეხობის, ვაჭარ-მრეწველების, თავადაზნაურობის, მოხელე-მოსამსახურებისა და სხვათა აღქმა, შეხედულებები და პოზიციები ქართული ეკონომიკის განვითარების შესახებ.

მიუხედავად ყოველივე ზემოთქმულისა, უნდა აღვინიშნოთ, რომ პარაგრაფის ციტირებების შინაარსი ეხება დისერტაციის თემატიკას და კარგი მასალაა იმ თემის დასაწერად, რაც დისერტაციის სათაურშია გაცხადებული. ხოლო ამ უძრავ ციტატას შორის ავტორისეული კომენტარები ან ამონარიდების შინაარსს იმეორებს, ან არააღეპვატურ და ციტირებასთან დაუკავშირებელ, ან გაუგებარ დასკვნებს იძლევა. 196-ე გვერდზე ერთ-ერთ ამონარიდს მოხდევს ავტორისეული კომენტარი, „საზოგადოების არც ერთი ჯგუფი სა-

სოფლო-სამეურეო მუშაობაში არ დებულობდა მონაწილეობას“¹. ამ წინადაღების აზრის შესახებ თვით ავტორს ვთხოვთ განმეორებითი კომენტარი. იგი აქ ამა-ნიჯებს უურნალ „მოგზაურის“ აზრს, რომელიც წერს, რომ ჩვენი თავადაზნაურობა სასოფლო-სამეურნეო მუშაობაში არავთარ მონაწილეობას არ იღებსო.

ეკონომიკისადმი მიძღვნილ დასკვნაში ან დასკვნის აღგილზე განთავსებულ უკანასკნელი აბზაცებში სრულიად უადგილოდაა საუბარი ეროვნული აჯანყების მიზანშეუწონლობისა და იღია ჭავჭავაძის მიერ შემუშავებული პროგრამის შესახებ. ნახევარგვერდიან პასაუში ობლად თვლებს ფრაზა: „სა-ქართველოს ეკონომიკური აღორძინება და გაძლიერება“, რომელიც, იღიას პროგრამის მიხედვით, თურმე უნდა მომხდარიყო „რუსეთის იმპერიის ფარგლებში“ (გვ. 201).

დაბოლოს, დისერტაციის „თავი VI. ეროვნული თავისუფლების ფენო-მენი“. ავტორის მეთოდი, რომ ამონაწერებითა და ციტატებით იაზროვნოს, მარტოოდენ ქართულ პრესაზე და საარქივო დოკუმენტებზე არ ვრცელდება. VI თავი იწყება ჰეგელის „გონის ფილოსოფიიდან“ და „ისტორიის ფილოსო-ფიიდან“ სამი მოზრდილი ციტატით, რომლებიც გვერდ-ნახევრამდე აღიღს მოიცავს. გერმანელ ფილოსოფის არ ჩამორჩება ფრანგი განმანათლებელი მონტესკიე, რომლის „კანონთა გონიდან“ ამონაწერი მოელ გვერდზეა განვი-ნილი. ამას მოსდევს ამონაწერები ა. სურგულაძის, ვ. ონიანის და სხვათა და სხვათა, მერე იწყება გაუთავებელი ციტირებები პრესიდან. ამგვარი „მეთოდი“ მხოლოდ იმაზე მიუთითებს, რომ ავტორი თავს არიდებს დამოუკიდებელ აზ-როვნებას, ანალიზს, ცდილობს ტექსტის შედგენის იოლ გზებს მიმართოს, ფონს გავიდეს სხვა ავტორების დახმარებით, სხვათა აზროვნებით.

დისერტაციის VI თავიც ამ პრინციპით არის შედგენილი. მასში, 202-231-ე გვერდებზე, ე.ი. 29 გვერდზე 69 იშვიათად მცირე და უმეტეს შემთხვევაში მოზრდილი ციტატაა მოყვანილი, რაც აღნიშნულ თავში ავტორისეულ ტექსტზე უფრო მეტია. VI თავის მიზანია: 1. ნაციისა და მისი ჩამოყალიბების შესახებ სხვადასხვა თეორიული მიმდინარეობების გადმოცემა; 2. რას ნიშავდა ქართველი ერის ცნობიერებაში ეროვნული თავისუფლება და როგორ „აღიქვამდა“ თითოეული სოციალური ფენა თუ ჯგუფი თავისუფლებას (გვ. 205).

თავიდანვე უნდა აღვნიშნოთ, რომ ამ მცირე თავის მიმართ ყველაზე ნაკლებად გვაქვს პრეტენზია. ნაშრომში საუბარია თავისუფლების განმარტების, ეროვნული მოძრაობის ფორმების ევოლუციის ხასიათის შესახებ. ცხა-

დია, უმეტესწილად, ეს ყველაფერი ხდება არა ავტორისეული ანალიზის, არამედ სხვა ავტორთა ნაშრომებიდან ციტირებების გზით (202-206). როგორც 208-ე გვერდიდან განვიძორტავს ავტორი, მან უკვე ისაუბრა „ერთიანობის იდეის“ შესახებ წინა თავებში და „ამჯერად ყურადღებას გავამახვილებ 1918-1921 წლებზე, საქართველოს დემოკრატიული რესპუბლიკის ხანაზე“ (გვ. 208). მოკლედ მიზნები და ქრონოლოგიური ჩარჩო განსაზღვრულია.

მაგრამ „დემოკრატიული რესპუბლიკის ხანაზე“ საუბარს ავტორი კვლავ 1801 წლიდან იწყებს, იხსენებს ილიას, სამოციანელებს, მოჰყავს ვაჟას სიტყვები. ამას მოსდევს ოქმები: თავისუფლების უზენაესობა, ერთიანობის საჭიროება (გვ. 211), (რომლის შესახებაც „უკვე ისაუბრა“ – დ. შ), შემდეგ: ავტონომია (გვ. 212), თავისუფლების სხვადასხვა და სოციალ-დემოკრატიული გაგება (გვ. 212, 213), თავისუფლების ნაციონალისტური და სოციალისტური ვერსიები (გვ. 214).

ამ კარგად ცნობილი რეალობების ამსახველი ციტირებების ამომწერი ავტორი, ერთი და იმავე ამონარიდის ციტირებასაც ახდენს. მაგ., 212-ე და 215-ე გვერდებზე ორი ზუსტად ერთი და იგივე ციტატაა მოყვანილი, თუმცა მათ წყაროდ სხვადასხვა დოკუმენტი სახელდება: ერთია უურნალი „განთიადი“, ხოლო მეორე – გაურკვეველი უანრის ნაწარმოები და უთარილო „ჩვენი მოთხოვნილებები“. ამ უკანასკნელს არც გვერდი აქვს მითითებული, მაგრამ ეს ხომ წვრილმანია. ჩვენ აღარას ვამბობთ უამრავი ციტირების შინაარსობრივ იდენტურობაზე.

მაგრამ არა უშავს, რაც მთავარია, საუბარი და უფრო სწორად ციტირებები თავისუფლების საერთო თემატიკას ეხება. ეს მაინც უსაფრთხო ზონაა – ციტირებები. მათში შეცდომის დაშვების ნაკლები საშიშროება არსებობს, მთავარია გადაწერაში არ მოგივიდეს შეცდომა. ყველაზე მეტ საფრთხეს ციტატიდან მორიგ ციტატამდე არსებული შუალედი შეიცავს. სწორედ ამ საშიშ ზონებში უშვებს ჩვენი ავტორი აზრობრივ, შინაარსობრივ, გრამატიკულ-სტილისტურ, ფაქტობრივ და სხვა ხასიათის შეცდომებს. აი, როგორც ახლა, როცა წერს ორგან: „ქართული სოციალ-დემოკრატიული პარტია სოციალიზმის განხორციელებისათვის იბრძოდა“ და „ქართული სოციალ-დემოკრატიული პარტიის ერთ-ერთი მთავარი იდეოლოგი ნოე ჟორდანია აღნიშნავდა“ (გვ. 215 და 216). ორივე შემთხვევაში ჩვენ უკვე მივუთითოთ, რომ 1918 წლამდე ასეთი პარტია არ არსებობდა და ჩვენ უკვე აღარ ვიცით, ეს ავტორის უცოდინრობას დავაძრალოთ, გულმავიწყობას თუ აზრის გამოთ-

ქმის პრობლემას.

შემდეგი ციტირებების შუაშიც, დავარქვათ ასე – ავტორის ზონაში, კიდევ მორიგი გაუგებრობა: „პირველი მსოფლიო ომის პერიოდში და ასევე მისი დასრულების შემდეგ ქართულ ბეჭდურ მედიაში გაჩნდა მოწოდებები ეროვნული ერთიანობის აუცილებლობაზე...“ (გვ. 216). დაუჯერებელია, რომ, თუ ავტორი ოდნავ მაინც დაფიქტდებოდა, ამ ფრაზაში არ დაწერდა სიტყვას: „გაჩნდა“. მან ხომ კარგად იცის, რომ 1900-იანი და მანამდელი პრესა სავსეა ეროვნული ერთიანობისაკენ მოწოდებების თემატიკით. მაში, რაღაც უნდოდა მის წინადაღებაში სიტყვა „გაჩნდა“-ს, მაშინ, როცა შეიძლებოდა ჩაეწერა თუნდაც „გაძლიერდა“.

დაბირებაც დაავიწყდა ავტორს, ამ თავში „დემოკრატიული რესპუბლიკის ხანაზე“ ვისაუბრებო. აგრე უკვე 219-ე გვერდზე ვართ და ავტორი მიხა-კო წერეთლის „ერი და კაცობრიობით“ დაინტერესდა. არ ვიციო, რომელი საზოგადოებრივი ფენის აღქმას გამოხატავს ჩვენი შესანიშნავი პატრიოტ-ანარქისტი, მაგრამ მისი 1910 წელს გამოცემული თხზულებიდან დისერტა-ციაში სამი ციტირებაა. მხოლოდ ამის შემდეგ 219-ე გვერდზე მიაღწია დი-სერტაციამ დემოკრატიული რესპუბლიკის პერიოდამდე. VI თავის ეს უკანას-კნელი გვერდები უშუალოდ დისერტაციის მთავარ თემატიკას პასუხობს. ჩვენ მხედველობაში გვაქვს ნაშრომის ის ნაწილი, რომელშიც ავტორი ეხება ქარ-თველი გლეხებისა და მუშა-მოსახლეობის დამოკიდებულებას თავისუფლების პრობლემის მიმართ. აქ ავტორი აკეთებს სწორ და იშვიათ დასკვნას, რომ „ქართული ერთობის წევრების უმრავლესობას არ ჰქონდა გაცნობიერებული თავისუფლების არსი. ბეჭდურმა მედიამ და საგანმანათლებლო სისტემამ ვერ შეძლო პრობლემის საბოლოოდ გადაჭრა“ (გვ. 226).

მაგრამ ეს მხოლოდ თავის მცირე ნაწილია. დიდი უმრავლესობა VI თავში მოყვანილი ციტირებებისა და ავტორის მსჯელობისა ეკუთვნის ინტე-ლიგენციის, პოლიტიკური პარტიების წარმომადგენლებს, ცნობილ პუბლიცის-ტებს. ეს მათი პოზიციებია დაფიქსირებული ნაშრომში და არა საზოგადოებ-რივი ფენებისა: მუშებისა, გლეხებისა, ქალაქის მოსახლეობისა, მოხელეებისა, ახალგაზრდობისა, გაჭარ-მრეწველებისა, ბურჟუაზისა, ხელოსნებისა და სხვათა და სხვათა, რომელთა ნაკრებს შეიძლება დაერქვას საზოგადოებრივი აღქმა. რაც შეეხება ვაჟა-ფშაველას, ნოე უორდანიას, მიხაკო წერეთელს, გიორგი გვაზავას, იაკობ მანსვეტაშვილს, არჩილ ჯორჯაძეს, გიორგი კვინი-ტაძეს, გრიგოლ ლორთქიფანიძესა და მსგავსთა მათთა, ისინი „კულტურულ

და პოლიტიკურ ელიტას“ წარმოადგენენ და მათი ნააზრევი ისტორიოგრაფი-ისათვის კარგადაც ცნობილი. ასე რომ, ნაშრომის ეს ნაწილიც მხოლოდ ნაწილობრივ პასუხობს დისერტაციის დანიშნულებას.

დასკვნითი ნაწილი. დისერტაციის უწვეულობის გამო ჩვენ მისი შეფა-სება დეტალურად გადაჭიფვიტეთ, რაც ნიშნავდა, ნაშრომის თავებისა და პა-რაგრაფების ცალკეულად შეფასებას. მოკლედ გავიმტორებთ ზემოთქმულს.

1. დისერტაციის პირველი თავი, ეროვნული პრობლემის ზოგიერთი სა-კითხი“, აბსოლუტურად არ პასუხობს თემის დანიშნულებას, მისი შინაარსი არ შეესაბამება მიზანდასახულობას, მასში არ არის განხორციელებული პრობლემის ადეკვატური კვლევა. ავტორს არ „წარმოუდგენა, თუ როგორ მოიაზრებოდა ქართველი ერის ჩამოყალიბება XX საუკუნის პირველი ოცნე-ლეულის ქართული კულტურული და პოლიტიკური ელიტის მიერ“ (გვ. 15).

2. მეორე თავის „§1. ქალაქი“ სამეცნიერო-კვლევითი და ანალიტიკური თვალსაზრისით არავითარ ღირებულებას და სიახლეს არ წარმოადგენს, მას-ში არ არის არც ერთი ახალი დებულება ან აზრი და ეს ხდება არა იმიტომ, რომ პრობლემის მართლაც სერიოზულად შესწავლა შეუძლებელია, არამედ იმი-ტომ, რომ ოთხი გვერდი პრობლემის წარმოსაჩენად სრულიად არაა საკმარისი.

3. აღნიშნულ პარაგრაფში, „სოფელი“, არ არის არავითარი სიახლე, დასკვნა, მოვლენის ინტერპრეტაცია, რაც დისერტაციას უნდა განასხვავებდეს ჩვეულებრივი სამაგისტრო ნაშრომისაგან. პარაგრაფში ვერ „აღდგა“ 1900-1921 წლების ვერც სოფელი და ვერც ქალაქი, რომლის მნიშვნელობაც, ავტო-რის თქმით, „მთლიანად სახელმწიფოს“ მნიშვნელობაზედაც კი დიდია (გვ. 26).

4. III თავის პირველი პარაგრაფი, „გლეხი“, უფრო სხვათა მიერ, ძი-რითადად კი სოციალ-დემოკრატების მიერ გლეხობის შესახებ მოსაზრებებით და ამონაწერებითაა გაჯერებული. არსად ჩანს თვით გლეხები როგორ აღიქ-ვამდინენ ეროვნულ საკითხს, რა დონის, ხასიათის, ხარისხის ეროვნული იდენტობა გააჩნდათ. ამის შესახებ უამრავი ციტირება სდუმს და ეს კი იმას ნიშნავს, რომ კვლევა სულ სხვა გზითაა წარმართული. პარაგრაფის შინაარ-სი და კვლევა არ პასუხობს ძირითად თემატიკას. მასში ერთი სიტყვაც არაა თქმული გლეხის ეროვნულ-იდენტობრივი ღირებულებების შესახებ: რა ადგი-ლი ეკავა მის ცნობიერებაში სახელმწიფო ეროვნულ-იდენტობრივი დამოუკიდებლობის, ეროვ-ნული თავისუფლების პრობლემას; პარაგრაფი, ძირითადად, გადმოგვცემს ქართულ ისტორიოგრაფიაში კარგად ცნობილ სოციალ-დემოკრატიულ პოზი-ციებს და ნაწილობრივ ინტელიგენციის შეხედულებებს გლეხობის ყოფა-

ცხოვრების შესახებ. დისერტანტმა საკმაოდ ბევრი იმუშავა, პრესაც დაამუშავა, 19 ციტირებაც მოიყვანა პრესიდან და საარქივო მასალებიდან, მაგრამ მისი მონაპოვარი, გამომზეურებული ამონაწერები, სხვა თემატიკას ეხება და არა ეროვნულ იდენტობას, გლეხკაცის ეროვნულ აღქმებს.

5. პარაგრაფ „პროლეტარში“ უმეტესწილად საუბარია სოციალ-დემოკრატიულ მოძრაობაზე, ორგანიზაციებზე, მათ სოციალურ მიზნებზე მხოლოდ პარაგრაფის დასკვნით ნაწილში, 64-69-ე გვერდებზეა საუბარი ეროვნულ თემატიკაზე (ფრაგმენტულად 59-ე გვერდზეც), ისინი მხოლოდ 1918-1921 წლების პერიოდს ეხება. თემატიკის ამგვარი განაწილება და ბალანსი აშკარად არაა საკმარისი, რომ აღნიშნული პარაგრაფი ეროვნული იდენტობისადმი მიძღვნილი დისერტაციის ნაწილად მივიჩნიოთ. პარაგრაფუში საერთოდ არაა ნახსენები და ნაჩვენები თვით ქართველი მუშა-პროლეტარის ეროვნული ღირებულებები, აღქმები. მრავალრიცხოვანი ციტირებებიდან ერთიც არ ეხება ქართველი მუშას ეროვნულ შეხედულებებს, რაც დისერტაციის მთავარ მიზანს და დანიშნულებას წარმოადგენს. ეს პარაგრაფი მხოლოდ ქართული სოციალ-დემოკრატიული მოძრაობისა და შემდეგ ხელისუფლების ისტორიის ეპიზოდებს ეხება.

ამ სახით აღნიშნული პარაგრაფი, ისევე როგორც მანამდელი ნაწილები, რამდენიმე თემატიკის ფრაგმენტების უწესრიგო კრებულს წარმოადგენს, სერიოზული, მრავალრიცხოვანი შეცდომების, ფორმულირებების, მარქსისტულ-ლენინური დოგმების რეციდივების თანხლებით. მათს შორის ოაზისებით გვხვდება სანტერესო ამონაწერები იმდროინდელი უძღიდრესი ქართული პრესიდან, რომელიც დისერტაციის კვლევით ნაწილს კი არ წარმოადგენს, არამედ სხვადასხვა თემატიკის სადისერტაციო მასალებს.

6. 8 ფურცლიანი „§3. ჯარისკაცი“ უნიკალურია, დისერტაციის წინაგანსილული ნაწილებისაგან განსხვავებით – ის დისერტაბელურია ე.ო. დისერტაციის თემატიკას პასუხობს. საუბარია პირველი რესპუბლიკის პერიოდის ქართველი ჯარისკაცის ეროვნული ცნობიერების, განწყობის შესახებ. ამონაწერებიც შესაბამისია, მაგ., გენერალ გიორგი კვინიტაძის შეფასებები ქართველი ჯარისკაცების ფსიქოლოგიური განწყობის, ბრძოლისუნარიანობის შესახებ (გვ. 73) და სხვ.

7. §4. სამღვდელოება. ესაა კარგად ცნობილი მოვლენების ფრაგმენტული ჩამოთვლა-კონსტატაცია. ერთადერთი სიახლე ესაა პრესაში მოძიებული ახალი ამონაწერები, რომლებითაც ძველი დებულებებია ხელახლა დასაბუთე-

ბული. იქნებ ესაა ავტორისეული ე.წ. „კომპლექსური ანალიზი“? ამ ნაშრომის მიხედვით თუ ვიმსჯელებთ, კომპლექსური ანალიზი არის სხვადასხვა კარგად შესწავლილი საკითხის, თემების შესახებ 15-დან 20-მდე ფრაგმენტის ციტირება 1900-იანი წლების უმდიდრესი პრესიდან.

8. რაც შეეხება მეოთხე პარაგრაფს **თავადაზნაურობის შესახებ**, მისი შინაარსი საერთოდ არ პასუხობს დისერტაციის მთავარ მიზნებს: მასში არაა ნაჩვენები ქართველი თავადაზნაურობის წარმომადგენელთა შეხედულებები, პოზიციები, მსოფლმხედველობა, მათი ეროვნული იდენტობა, ეროვნული დირექტულებები და ა.შ. ამონაწერები ეხება პოლიტიკური პარტიების ორგანოების მიერ გამოთქმულ პოზიციებს, შეხედულებებს. პარაგრაფში საერთოდ არ ჩანს ქართველი თავადაზნაურობის დამოკიდებულება მიმდინარე პრიცესებისადმი, ეროვნული მოძრაობისადმი, სახელმწიფოებრიობისადმი, ეროვნული მახასიათებლებისადმი და ა.შ. ტექსტი შეიცავს მრავალრიცხოვან ფაქტობრივ და აზრობრივ შეცდომას და დებულებას.

9. **ბურჟუაზისადმი** მიძღვნილ პარაგრაფში, ჩვენთვის უცნობი დარჩა მთავარი საკითხი: ვინ იყვნენ ქართული ბურჟუაზის წარმომადგენლები, რას ფიქრობდნენ ისინი ეროვნული დირექტულებების შესახებ და რა პოზიციები გააჩნდათ მის მიმართ; რა დამოკიდებულება ჰქონდათ მათ მიმდინარე ეროვნული მოძრაობისადმი, როგორ უყურებდნენ ისინი ისტორიულ წარსულს, ტრადიციებს, რელიგიას, ეკონომიკას, უცხო ბურჟუაზიას და ა.შ. იმ ერთი ამონაწერით კი არ უნდა დაკმაყოფილებულიყო დისერტაციის უურნალ „კლდიდან“, არამედ მას სწორედ ეს უურნალი და გაზეთი „საქართველო“ უნდა შეესწავლა და იქიდან ამოქრიფა ქართული ბურჟუაზიის მსოფლმხედველობრივი ავლადიდება. ერთი სიტყვით, დისერტაცია ამ პარაგრაფშიც საკმაოდ გამრჯედ იმუშავა, ამონაწერა მრავლად ციტატები, რომელნიც სხვა თემატიკას ეკუთვნის და არა წინამდებარე დისერტაციას.

10. ანალოგიური მდგომარეობაა **ინტელიგენციისადმი** მიძღვნილ ქვეთავში. მსჯელობა და ამონაწერები არ ეკუთვნის ინტელიგენციის წარმომადგენლების ეროვნულ შეხედულებებს, მათ დამოკიდებულებას ეროვნული სიმბოლოებისადმი, მახასიათებლებისადმი და ა.შ. ესაა პარაგრაფი ინტელიგენციის შესახებ, რაც ისედაც კარგადაა ცნობილი. ამის გამო ნაშრომის ეს ნაწილიც ვერ ჩაითვლება დისერტაციის შემადგენელ ნაწილად.

11. IV თავში ამონაწერები და შინაარსი სრულიადაც არ ემსახურება „ნაციონალური ნარატივის ფორმირებას“. მეტიც, ისინი არც შეიძლება ქმნი-

დნენ ნაციონალურ ნარატივს, რადგან 1900-1917 წლებში არც მომხდარა ნაციონალური ნარატივის „ფორმირება“. თვით საკითხის ამგვარად დასმა ნონ-სენსია. ნაციონალური ნარატივის, ნაციონალური ბირთვი-იდეების კონსტრუირება იღია ჭავჭავაძის მთავარი დამსახურებაა, რომელიც მან განახორციელა XIX საუკუნის მეორე ნახევარში. ამდენად, „ნაციონალური ნარატივის ფორმირების“ პერიოდად მისი გადმოტანა და გადმომისამართება 1900-1910-იან წლებში სხვა არაფერია, თუ არა ქართული საზოგადოებრივ-პოლიტიკური ცხოვრების გაპრიმიტიულების განზრახ თუ უნებლივ გამოვლინება. სხვა ამ-ბავია, რომ ამ პერიოდში გრძელდებოდა დისკურსი ნაციონალური ნარატივის შემდგომი სრულყოფის შესახებ, ეს სულ სხვა თემაა. მასში იგულისხმება პოლიტიკური პარტიების შექმნა, მათი ეროვნული იდეოლოგიების ჩამოყალიბება, პროგრამების კონსტრუირება, ეს ფაქტები ჩვენს ისტორიოგრაფიაში საკმაოდაა შესწავლილი და მას დისერტაციის ავტორი საერთოდ არ ეხება.

12. V თავის §1 „საშრომლო“. ციტატებით გადავსებულ ამ ნაშრომს და, კერძოდ, ამ პარაგრაფსაც უფრო მასალები უნდა ეწოდოს. თავისთავად ეს არ გამორიცხავს, რომ ამ ამონაწერების გაკეთებით ავტორმა სასარგებლო საქმე გააკეთა: მან მომზადა მასალები. ამგვარი მიდგომით განისაზღვრება დისერტაციის ჟანრიც, თუ ასეთ ჟანრს ითვალისწინებს სადისერტაციო წეს-დება. წინამდებარე ნაშრომი არის მასალების შეგროვების დონეზე შესრულებული პროდუქცია. ამ მხრივ შესრულებულია შრომატევადი სამუშაო.

13. დისერტანტმა ვერ დაძლია, ვერ შეძლო „ეპოქის“ თავისებურებების გაგება-გააზრება. ქართული ენისა და განათლებისადმი მიძღვნილ პარაგრაფ-შიც კვლევა არსებითად მაშინდელი პუბლიკაციებიდან მრავალრიცხოვანი ნაწყვეტების ამოწერით, ციტირებებით ამოიწურება.

პარაგრაფის დასაწყისში ავტორი გვაფრთხილებს: ქართული ენა და საგანმანათლებლო სისტემა არაერთხელ გამზღვდარა მეცნიერთა შესწავლის სა-განი და „მათ შორის მეჭდური მედიის საშუალებით“. ასეთ ვითარებაში დი-სერტანტის მიზანი ამ თავშიც ისაა, რაც ნაშრომის სხვა ნაწილებში: „ეპო-ქის მოთხოვნებიდან გამომდინარე, თითოეული ატრიბუტი ერთიან კონტექსტში“ განიხილოს. კი, მაგრამ, თუ ყველა ზემოაღნიშნული და ქვემოაღნიშნული პრობლემა შესწავლილია, განა არა სჯობდა, რომ აღნიშნულ პრობლემათა შემსწავლელი სპეციალისტების დასკვნები და მოსაზრებები დასდებოდა ერთ-ერთ საფუძვლად დისერტაციას? მიუხედავად ამისა, ავტორმა შესწავლილის ხელახლა შესწავლა გადაწყვიტა ვითომ, რაც სხვადასხვა თემატიკაზე ამონა-

წერების ციტირებებით ამოიწურა საბოლოოდ. „ერთიანი კონტექსტი“ კი სხვა არაფერია თუ არა სხვადასხვა იდენტური მახასიათებლების შესახებ ამონაწერების თავმოყრა ერთ ნაშრომში.

14. §3. „სარწმუნოება“. ეს ოთხგვერდიანი პარაგრაფი მინიმალურადაც არ პასუხობს ავტორის მიზანდასახულობას, გაეშუქებინა სარწმუნოების მიმართ „საზოგადოების თითოეული სოციალური ფენისა თუ ჯგუფის ცნობიერება“. ასე რომ, ეს პარაგრაფიც მეცნიერულად არაფრისმოქმედია და არავითარ კვლევას არ წარმოადგენს.

15. ვერც თემატურად და ვერც შინაარსობრივად ეს მცირე მონაკვეთი-პარაგრაფი ქალის, დედის საკითხის შესახებ იდენტობისადმი მიძღვნილი ნაშრომის ორგანულ ნაწილად ვერ ჩათვლება. იგი არც გენდერის პრობლემას იკვლევს. ციტირებებში მხოლოდ იმაზეა საუბარი, რომ განსახილველი პერიოდის ქართველი ქალი-დედები ან კარგად და ან ცუდად ზრდიდნენ სამშობლოს პატრიოტ შვილებს.

16. ეკონომიკურ პარაგრაფში არ ჩანს მოსახლეობის სხვადასხვა ფენების დამოკიდებულება და პოზიცია, ანუ „საზოგადოებრივი აღქმები“ ეკონომიკის განვითარების პრობლემებზე. პარაგრაფში და ნაშრომის სხვა ნაწილებში ერთი სიტყვაც არ მოიძებნება, რომელიც დაადასტურებდა ან გამოავლენდა ქართული ბურჟუაზიის თუნდაც ერთი წარმომადგენლის პოზიციას, აზრს ან შეხედულებას ეროვნული ეკონომიკის განვითარების პრობლემების შესახებ. მასში არაა შესწავლილი სოციალური ფენების, კერძოდ, გლეხობის, ვაჭარ-მრეწველების, თავადაზნაურობის, მოხელე-მოსახლესახურებისა და სხვათა აღქმები, შეხედულებები და პოზიციები ქართული ეკონომიკის განვითარების შესახებ.

17. დიდი უმრავლესობა VI თავში მოყვანილი ციტირებებისა და ავტორის მსჯელობისა ეკუთვნის ინტელიგენციის, პოლიტიკური პარტიების წარმომადგენლებს, ცნობილ პუბლიცისტებს. ეს მათი პოზიციებია დაფიქსირებული ნაშრომში და არა საზოგადოებრივი ფენებისა: მუშებისა, გლეხებისა, ქალაქის მოსახლეობისა, მოხელეებისა, ახალგაზრდობისა, ვაჭარ-მრეწველებისა, ხელოსნებისა და სხვათა და სხვათა, რომელთა ნაკრებს შეიძლება დაერქვას საზოგადოებრივი აღქმები. VI თავში წარმოდგენილი არათანიმდევრული მსჯელობა და ამონაწერები ეკუთვნის „კულტურული და პოლიტიკური ელიტის“ წარმოადგენლებს, რომელთა ნააზრევი ისტორიოგრაფიისათვის კარგადაა ცნობილი. ასე რომ, ნაშრომის ეს ნაწილი მხოლოდ მინიმალურად პასუხობს დისერტაციის დანიშნულებას.

ჩვენ ხშირად აღვნიშნავდით, რომ დისერტაციაში დამოწმებულ ამოწერილია უჩვეულოდ მრავალრიცხოვანი ციტირებები, ამონაწერები, ამონაწერები, ზოგ შემთხვევაში ორ-სამ ფურცლიანი დოკუმენტები. 230 გვერდიან დისერტაციაში მოყვანილია 350-ზე მეტი ციტირება. ფაქტობრივად, დისერტაცია ამონაწერებისაგან შედგება და თითქმის ნაშრომის ნახევარს მოიცავს. ამ მხრივ წინამდებარე ნაშრომი უნიკალურია.

რაც შეეხება დისერტაციის ე.წ. დასკვნას, მასში არ არის არც ერთი აზრი და წინადადება, რომელიც სიახლეს შეიცავს ან კიდევ ისეთი, რომელიც საეჭვო ღირებულებისა არ იყოს. მასში გამეორებულია ფაქტობრივი და აზრობრივი შეცდომები, რომ რუსეთის მიერ დაპყრობილ საქართველოში „მონარქიული სისტემა აღარ არსებობდა“; უარყოფით ისტორიულ მოვლენა-დაა ფორმულირებული ბატონყმობის გაუქმება; თითქოს კაპიტალიზმის განვითარებამ ფუნქციები შეუზღუდა გლეხობას და ა.შ.

ჩვენ არაერთხელ აღვნიშნეთ და გამოვავლინეთ, რომ დისერტაცია შეიცავს მრავალრიცხოვან ფაქტობრივ და აზრობრივ შეცდომას, ცნობილი ისტორიული მოვლენების მცდარ და არაზუსტ ფორმულირებებს. ამჯერად ამ შეცდომებს, უზუსტობებს, უცოდინრობებს, ამ თავისებურ „აღმოჩენებს“ „ერთიანი კონტექსტის“ სახე რომ მივცეო, ჩამოვთვლით. დისერტაციაში ვკითხულობთ, რომ:

- 1900-1921 წლების პერიოდში ხდება „სხვადასხვა სოციალური ფენების წარმოშობა“ (გვ. 7);
- „დაგამუშავე 1900-1921 წლებში გამომავალი ყველა ქართულენოვანი ურნალ-გაზეთი“ (გვ. 9);
- „ქალაქის მნიშვნელობა სახელმწიფოს მნიშვნელობაზე დიდია“ (გვ. 26);
- „ქალაქები 1900-1921 წლებში სამრეწველო ცენტრები ხდებიან“;
- „1918-1921 წლების დამოუკიდებელ საქართველოში გლეხის „მთავარი პრობლემა ისევ მიწა და პირადი თავისუფლება“ იყო (გვ. 46);
- „რაც შეეხება 1918-1921 წლებს, როდესაც ხელისუფლებაში მოვიდნე დემოკრატიული ძალები, მათი მოღვაწეობის პარალელურად ბოლშევიკები ცდილობდნენ, რომ საზი გაესვათ ხელისუფლების არასწორ დამოკიდებულებაზე მუშებისადმი და თავის მხარეზე გადაბირონ“ (გვ. 63);
- „ქართულ სოციალ-დემოკრატის საწყის ეტაპზე პქონდა ანტიქართული პოზიცია“ (გვ. 39);
- 1900-იან წლებში არსებობდა „ქართული სოციალ-დემოკრატიული

პარტია“ (გვ. 52, 71, 215, 216);

– ქართველი თავად-აზნაურობის „აშკარა“ კრიტიკა იწყება 1900 წლიდან (გვ. 100);

– 1900-1917 წლებში მიმდინარეობდა ბრძოლა არა მხოლოდ რუსეთის თვითმყრობელობის წინააღმდეგ, რაც პირველ რიგში კულტურით, განათლებით ბრძოლას გულისხმობდა...“ (გვ. 102);

– 1900-1917 წლების პერიოდში, „თავადაზნაურობა იმ წოდებას ეკუთვნოდა, რომელიც წარსულს აიდიალებდა და ძველი დროის დაბრუნება მხოლოდ იმიტომ სურდა, რომ აღედგინა ის გავლენა და პრივილეგიები, რაც საუკუნეების მანძილზე გააჩნდა“ (გვ. 102);

– რუსეთის გაბატონება ქართველი ხალხისათვის ეროვნული სიმბოლოების, მათ შორის კი, „ქრისტიანობის დაკარგვა-გაუქმებაში გამოიხატებოდა...“ (გვ. 104);

– „ამ შერივ აღსანიშნავია, ჯერ კიდევ 1907 წელს ვარლამ ჩერქეზიშვილის ჰავაგის საერთაშორისო კონფერენციაზე გამოსვლა“ (გვ. 117). ასეთი რამ არ მომხდარა;

– 1900-1917 წლების პერიოდში მოხდა „ნაციონალური ნარატივის ფორმირება“ (გვ. 122);

– XX საუკუნის 10-იანი წლების საქართველოში აქტუალური ხდება ნაციონალური სიმბოლოები, ნაციონალური იდეალები“ (გვ. 135);

– მეფის ცენზურა ხელს უშლიდა ქართულ მედიას, ეწერა წარსულზე, ისტორიაზე და ა.შ. (გვ. 131);

– ეროვნული პრობლემის კვლევის თეორიული მიდგომის „მთავარი ფუძემდებელი“ იყო მიხაკო წერეთელი (გვ. 147);

– „ჯერ კიდევ 1917 წლის ივლისში საქართველოს და ამიერკავკასიის პროლეტარიატი ბოლშევიკების ხელმძღვანელობით...“ (გვ. 163) და ა.შ. და ა.შ.

ყოველივე ზემოთქმულიდან გამომდინარე, დავსკვნით, რომ ნატო სონდულაშვილის წინამდებარე სადისერტაციო ნაშრომი „ქართული ერთობა და ეროვნული იდენტობა XX საუკუნის პირველ ოცნებულში“ ვერ აკმაყოფილებს სადოქტორო დისერტაციის მოთხოვნებს. იგი ვერ პასუხობს თემის სათაურს და დანიშნულებას. წარმოდგენილი ნაშრომი არ არის ეროვნული იდენტობის ისტორია, არამედ ეს არის ქართული ერთობისა და ეროვნული იდენტობის შესახებ ქართული პრესიდან არათანმიმდევრულად ამოწერილი ინფორმაციების, ციტირებებისა თუ ამონარიდების არათემატური და ცალმ-

ხრივი კრებული. ფაქტობრივად, ეს უჩვეულოდ მრავალრიცხოვანი ციტატები, რომელიც თავისთავად ღირებულია, როგორც საკვლევი პერიოდის ნაზრევი, შეიძლება გამოდგეს ამავე თემის ნაწილობრივ მასალად. ნაშრომის თავგზისა და პარაგრაფების შინაარსი საერთოდ არ ეხება თემის დანიშნულებას, ხოლო მათი ნაწილი მხოლოდ ცალმხრივად პასუხობს სათაურებსა და მიზანდასახულობას, მასში ცოტაა მშანად არსებული სოციალური ფენების საზოგადოებრივი აღქმები და ბევრია კულტურულ-პოლიტიკური ელიტის ნაზრევი, რაც ისედაც ცნობილია.

დისერტაცია შეიცავს მრავალ სერიოზულ ფაქტობრივ და აზრობრივ შეცდომას, ანალიზი და ავტორისეული მსჯელობა მეტად არაკვალიფიციურია; ავტორი ამჟღავნებს საკვლევი პერიოდის ისტორიის ელემენტარულ უცოდინრობას და ვერ აცნობიერებს ეპოქის ბევრ თავისებურებას; ამასთან, ნაშრომში ხშირად გვხვდება არაზუსტი, არაკვალიფიციური, წინააღმდეგობრივი, ბუნდოვანი ფორმულირებები და, რიგ შემთხვევაში, საბჭოთა ისტორიოგრაფიისათვის დამახასიათებელი პარტიულ-იდეოლოგიური დებულებები.

როგორც ჩანს, წინამდებარე ნაშრომის სისუსტის ერთ-ერთ მიზეზად უნდა მიჩნეულ იქნეს სადოქტორო დისერტაციების შესრულებისა და დაცვის მეტისმეტად გამარტივებული სისტემა, რომელიც სერიოზულ მოთხოვნებს არ უყენებს მომავალ მეცნიერ-ისტორიკოსებს. სწორედ ამ სავალალო გარემოებამ აგვალებინა ხელში კალამი, ჩვენი ყოფილი შრომისმოყვარე სტუდენტისა და მაგისტრანტის ნაშრომზე გამოხმაურებისათვის. დისერტაცის კეთილგანწყობილად ვურჩევთ, ახლა მაინც გაითვალისწინოს ჩვენი შენიშვნები, ფუნდამენტურად გადაამუშაოს დისერტაცია და მხოლოდ ამის შემდეგ გამოსცეს წიგნად.